

Gambini Golpo




STONMAN J. SANGMA
1991

AMBINI GOLPO




BY
STOWMAN J. SANGMA



MALCHAPARA VILLAGE
West Khasi Hills, Meghalaya

Published by Stowman J. Sangma with financial assistance from Arts and Culture Deptt., Govt. of Meghalaya Shillong and Printed at Eureka Printers, Donbosco Road, Laitumkhrach, Shillong Meghalaya.



AGANCHENGAN

*Ia ming 11 chimonggimin kan'dikgipa golporangko
iga chonchongipa bi'sarangna miksonge chapa ka'ataha.
arang toe skiani gnanggipa aro bi'sarangko gisik
ngatbegnigipa golporang ong'a. Golpo mingantina anga
lingsa ba minggni noksarangkoba on'aha. Anga bebe
ia golporangko bi'sarang aro dal'dalgiparangba
nikgen.*

*On'gimin noksarang golponi katta aro obostaranga
raa ong'janaba gnang aro seani rokom-bewalrangba
oraigipa sakantini namnikani gita ong'janaba gnang.
nggijarangko namdapate, chu'onggijarango on'dape
esokode aro iani bidingo saoba angna maiba kupatianiko
genchimode, sonako, muktako gita anga uarangko
mchatnikbegenchim.*

*Ia kitapko poraiachi dal'drobaenggipa skie ra'eng-
A'chik bi'sarang mingsasiksik maiba dakchakaniko
namgnikode man'chongmotgen ine anga ka'donga.*

MITELBEA

STOWMAN J. SANGMA

JA·PANG KATTARANG

Jak

1. SUKROBAL SAL (ENA aro MENA)	3—7
2. SONIBAL SAL (CHALAKKIGIPA BUDEPA)	8—16
3. SKANGGIPA ROBIBAL (Sigimin Segipa)	17—22
4. GNIGIPA ROBIBAL (Runsa)	23—29
5. GITTAMGIPA ROBIBAL (Gurasni Sonani Tangkarang)	30—36
6. BRIGIPA ROBIBAL (Tim aro Timpa)	37—42
7. BONGAGIPA ROBIBAL (Skigipa Skal Bak 1)	43—47
8. DOKGIPA ROBIBAL (Skigipa Skal Bak 2)	48—50
9. SNIGIPA ROBIBAL (Gongani Depante)	51—56
10. CHETGIPA ROBIBAL (Bonga)	57—60
11. SKUGIPA ROBIBAL (Bonggit aro uni Silgrakni Cup)	61—68

1. SUKROBAL SAL

Kamrup districtni salgipengo badiaba burung-bòlgrimni jatchlo chongipa gitim damsa dongachim. Song jelja, nokking bang'ja, a'brirangni gisepo chongipa a'kaweosa blapna krakra gitim gimiko nok 16 mangmangsan dongaia. Gitimni salaram saliram aro salgreo nina nitoriri bo'rot-bo'tot ongipa a'brirang guare gita duultoka aro salgipengchipako cholguga gita chibima dilsani rikamona kingking a'kawe dakjoljolangachim. Ia a sal gnanggipa a'kaweo mimi-sirangko ge e-game cha'ana agreba chibimani rikamranga ma'manti me'su-sam jakrangni baganrangkoba dakna man'achim. Indaken ia blapo manderang nengraen kusi ong'e janggi tangna cholko man'achim.

Ua gitimo buchuma saksa dongachim. Gitimni a'palo chibimari rikamo rokomanti me'surangni baganko dake uanon ua bilsi gimikgimik dongachim Indaken bi'sarag ua buchumako gisepo uamangni gitimo nikoba uamangni gitimonin ong'a ine uijachim

Da'alo Good Friday ong'a. Bi'sarang skul chuti man'toka. Ia salo bi'sarang pilakan rona, kal'na, ring'na chio jroe rona aro eko ska ukon dakna jakgitel ong'tokachim. Good Fridayni pringni gilja matchoto bi'sarang buchumani a'dapona dakanggipa rama gitan saksa sakgipinna katta agangrikjoljole re'baengachim. Buchumuni jamdapona sokon uamang ua nokchiko nie adita cha-dengtokaha. Ua nokko galchipgimin nok gita nitachim.

"Angade ia blapkode namnikjasal," saksa aganaha,

"Angaba namnikjasal," sakgipin aganpaaha,

"Angade ia nokkode skalni nok gitasan nikaiade."

"Oe. Skalrangde pangnan songni chel'ao chibimarangni rikamrangosa nok rike dongrongana. Aro mandaba ong'chong, matchub^a ong'chong, saksan-mangsan roamgipakode chike cha aiana."

Indaken bi'sarang an'tangtangni gisepo betbete saksa sakgipinni agana kattarangna aditan kena naptokaha. Buchumaba

~~bi'sarangni jikjakaba naknigoni dugkatbaha.~~ Bi'sarang kenbeaha aro katna am'engachim, indiba buchuma uamangni kenako nike an'tangona re'bachina jakjipataha. Kenbeoba bi'sarang buchumani sepangona re'batokaha. Buchuma uamangna maiba namgijuko dakgen ine uamang kensoengachim, maina giseposan ua gitimona re'barongaiani gimin mikmaltokjachim.

A'bachengo bi'sarang ua buchumako namgijagipa ine chan-chiachim, indiba dikdiksani ja'manon uni ka'sae daka aro agana-nirangko nike uamang ua buchumako namgipa aro ka saminggipa ine uina man'aha. Uamang da'o buchumana kenchajaha, batesa uko namnikbatrorona a'bachengaha aro bon kamao uamang uko namnikbeaha. Buchumaba bi'sarangna ka'saaha aro i: neng'takani salo uni gital dambe ripengrangko seng gnang watatpilna sikipiljaha. Indiba mai cholchi bi'sarangko ua ru'utbatkale an'tangni jamdapo rikkina man'gen? Mai cholchi ua bi'sarangko an tangni namnika gita jamdapo an tang baksa dongatna man'gen? Maibachi uamangko kusi ong'atna man jaode aro namnamgipa, su'ugipa, gisik nangat-begni'na aro skidapanian gapgipa golporangk, agane uamangni; gisikrangko salna aro ka'tongrangko muni nangatna man'jaode ku'sikarichide uamangko an'tangni nang'ika gita an'tung baksa jamdapo dongatna man'jawa ine ua nikaha.

"Na'simang tom'tome asong'okode aro angna nachil song-tokode anga na'simangna golpo mingsako aganna namnikhegenchim," buchuma aganaha.

"Ka'sapae ambi, chingna golpo aganbo. Chinga tom'tome aro gisiko nange knatimtokgen," chrochro bi'sarang agantokcha.

"Indakode anga na'simangna ENA aro MENA minggipa abisani golpoko agangen."



Picture 1. Bi'sarang buchumani a'dapona dakbagipa ramakon re'baengachim.

Unikoa buchuma a'bachengaha :

"SAKSA SILKAMALO sakgni jikgiparang-jikmongma aro jikgite dongachim. Uamang soksan cha'gipa, oksanoni ong'katgipa abisa kam'dakrang ong'achim. Abitango demechik saksa aro nogipao depante saksa dongachim, Abitangni demechikko ENA aro nogipani depanteko MENA mingachim. Segipa atte-gitchirangko doke, uarangko antio pale, pelsa pelgni man'paa tangka-paisarangchisa jikko-deko alduaichim. Uni jikgiparang saksa sakgipin baksa meli-nangrime dongtokja, bobilrang gitasa dongtokaichim. Salsao uamang chibi-maona auna re'angtokaha. Abitangni chirikamo auengmitingo uni nogipa uko chibimani tu batsranggipa bakchina jitpakataha. Wariona ga'akearion, chini mitde una ka'sachakbee, uko ki'sing pil'atskaaha.

“Noko, segipa silkamal jikmongmani gimin sing'on. jikgite aganchakaha, 'Ua apamangona re'angengana.'"

“Antisa batangaha, indiba jikmongma nokona re'bapiljaha. Unigimin silkamal niotang-o'biteni nokona re'ange an'tangni jikgipani gimin sing'eaha. O'bite chawarina aganchakaha, 'Baosa, ia salrangode ua chingona re'baan dongjade.'"

“Silkamal nokona re'bapile, ka'a nangbee an'tangni jikgiteo jikmongmani gimin sing'etaiaha. Indiba, 'Ua bachi re'anga angade uija' inesan tol'e aganchakaiaha.

“Da'o jikgite an'tangni desaron Enako duk on'na a'bachengaha. Je cha'anirangkoba ua chu'onge man'pajachim, aro basakoba basakobade mi gri chi gri salgimik okumu chakrongna nangachim. Salsao me'chik bi'sa, Ena auna ine chibimaona saksan re'angon, mangsa dal'begipa ki'sing chininingoni ong'katbae, an'tangni demechik Enaona joljol malbaaha. Ena namen kenbeaha aro katna a'bachengaha, indiba Ena ja'ku de'na skangan ki'sing aganaha, 'Kennabe, angde. Angan nang'ni ma'gipa ong'a.' Unikoa ki sing an'tangna ong'a pilakkon an'tangni demechik Enana agane on'tokaha. Ki'sing namnambegipa cha'anirangko ra'bae Enana cha'china on'aha. Uandaken ki'sing salantian Enana namnambegipa cha'anirangko ra'bae, cha'na on'rongaha.

“Noktanganiko cha'anirangko man'e cha'pajaoba Enako on'tisaba ong'sie aro bilgrie nikjachim. Batesa uko an'sengbate aro mangrakbate nikachim. Salsal namnambegipa cha'anirangko cha'gipa Menade ma'ani alduako man'genchimoba, milani pal ram'sisi-ram' dengdeng dakrroangengachim. Iako nike ma'detang Enako gipin nokrango maikoba cha'rongahama ine sing'aha. Ena aganchakaha 'Ong'ja ama, nang'ni on'arangko cha'rongana agre anga pilakoba mamung cha'anirangko cha'jaha.' Salantian Ena chibimaona auna re'angronge, attam walsimsimosa nokona re'bapilrongachim. Salsao, ma'detangni depante Mena, an'chengo Enani ki'sing baksa roe cha'anirangko cha'e salgimik roako nikeaha. Nokona re'bae ua ma'gipana chibimani rikamo an'tangni nika pilakkon agane on'etokaha.



Picture 2 'Kenabe, angde. Angan nang'ni ma'gipa,' ki'sing agnaha.

"Chibimao ong'a pilakko ma'sie uni ma'detang Enako skangna bate duk on'batna a bachengaha. Basakoba basakoba ua Enako mamung a'sel grian, chonbeani giminba chaktopilgija sasti on'aha aro basakoba basakobade daktopilgijagipa aro rakbegipa kamrangkoba dakdrana aro ka'drana on'e Enako duk on'aha.

"Adita salangni ja'mano, ua palango romrome ma'amruruna a'bachengaha. Segipa uni indake dakako nike, mai ong'aha ine sing'on ua aganchakaha, 'Angni ja'a, jak aro be'en gimikan namen sabeenga'. Mai cholchi maiko dake jikgipani saknaako namatgen ine sintie dongako nikon jikgipa aganaha, 'Na'a angna ka'saode angni saknaako namatna maikobade dakbo!' Segipa duk ong'bee aganaha, 'Indakode anga maiko dakbo?' 'Iandakgipa rok-rogi ki'sing be'enko cha'ode nama aro a'gilsako iana agre gipin chol dongja ine manderang agana. Uni gimin je cholchiba na'a angna ki'sing be'enko ra'babo. ong'jaode

anga salgnini gisepon sichongmotgnok!' jikgipa ma'amrurue, romrome agana dakmikaha. 'Indiba baoniko ia salni gisepo anga ki-sing be'enko man'e ra'bagen!' segipa duk ong'bee sintie aganaha. 'Chibimao, auram ghato mangsa ki'sing ong'katronga ine nikgiparang agantoka. Bakbak na'a je cholchiba ua ki'singko rim'e ra'babo,' jikgipa aganaha.

"Uni gimin adita chekrangko ra'e gipin manderangni dakchakani-chi, jikgipani agangipa ki'singko rim'na man'aha. Uamang ua ki'singko karomtome nokona ra'baaha. Manderang uko so'otna dakon, ua aganaha, 'Angko so'otpanabe. Na'simang manigija angko so'otgenode ja'mano na'simang dal'bea duko ga'akgen.'

"Ki'singni aganna man'ako nikon manderang aiao inmanpile sing'aha, 'Mande gita aganna man'ara na'ara sawa?"

"Chibimaona auna re'bao maikai ua chibimani wariona tang'angaha aro wariona sokearion maikai chini mitde ka'sachakbee uko ki'sing pil'ataha, pilakkon ki'sing silkamalna aro dongpagipa pilaknan agane on'tokaha.

"Jikgite uni kattana on'tisaba nachil songgija, ki'singko bakbakan so'otnasa segipako draaha. Unon bakan ki'sing chrike aganaha, 'Ia me'chikan angko tu'begipa wariona jitpakataha !'

"Jikgite an'tangni dakgimin namgija kamko aro papko pindapna jotton ka'beoba pilakchiba man'jaha. Segipa jikgiteko uni namgijagipa kamna ka'o nangbee chibimani tu'batsranggipa wario galatchina manderangko ge'etaha. Chibimaona soke, tu'begipa wariona galaton dal'begipa gorial mangsa uko topsoe, matsrambegipa wagamrangchi chiktongtonge cha'aha.

"Denggugipa jikgite da'o sijok ; indiba silkamalni noko jikgiteni dakanggipa duk aro neng'nikanirangde jrongkujachim. Ki'singko mandeni bimangona ra'bana nanganian uni dakna nanggipa dal'begipa kam ong'achim. Segipa ki'singo sing'aha, 'Da'o na'a maikai mandeona pil'skana men'gen ?' Ki'sing aganchakaha, 'Krite-amue na'a chini mitdeko kusi ong'atna aro namnikatna man'ode anga mande pil'taigenchim !'

"Jikgipani agana gita dakon ki'sing skang gitan mande pil'taie, segipemung damsan kusi ong'e dongangtaikuna man'aha.

“Golpo ianon bon’aha.”

“Ia namgijagipa jikgite uni abitang, jikmongmako mikbuaha aro ua uni ka tong ning’o mikbuani namgijagipa papko dal’ataha. Bon’kamao ua uko so’otaha. Nambo ba namjabo, kam mingantini bitede donga. Namgipa bitchriko satgipa namgipa biteko rata aro namgijagipa bitchriko satgipa namgijagipa biteko rata. ‘Mende jeko sata ukon ratgen.’ Uandake, jikgite je bitchriko sataha ukon ua rataha-ua so’otako man’aha.

“De, da’ode na’simang pilakan noktangona re’angpiltokbo. Angni golporangko knatimtaina namnikode chol ong’an salo re’batoktaibo.”

Unikoa bi’sarang noktangtangona re’bapiltokaha.



2. SONIBAL SAL

Da'al Sonibal sal ong a. Sonibal salode skul chuti ong'a. Songai pilak bi'sarangan jakgitel ong toka. Gitchak-rimit ma manti bibalrangan bala, tangsekgilgil bijimgipa samdim-boldimrang balsiri baiwana jipjang jipjang mojimenga aro mikka-aram gri rona gitik gitik sal namen nambeachim. Bi sarang ka'sroke git ring'e jaku itinge toktok dake chio jroe aro kal grike rona aro knatobegipa golporangko knatimna buchumani noktop-jamdapcna re batokengachim

"Ambi golpo agantaibo" bi sa saksa aganaha

"Minio aganana nambatako," salgipin agardapaha.

"Samsi pikrokna, a a gamna nana, basakoba aganadong" buchuma jechakaha

"Ong ja ambi, na a aganna nanga," bi sarang buchumako duultoke, saoba jako aro saoba ba rao rim dingdinge mol moltokaha

"Atcha indakode, na'simang tom tom aro jrip dongtckbo, na si-mangna CHALAKKIGIPA BUDEPA-ni gelpoko anga agangen "

"Unikoa ua a bachengaha:

"CHANGSAO, BADIABA chongipa gitim dams o adasa ma'drang saksni dongachim Uamang pilakan cha ue aro namgiyako dake janggi tangtokaiachim Uamang jik kimtoke an tangtangna nokrangko rike dingtang biaprango dongoba, jeko dakoba rengsi sika gita toksan k'mkro dakachim, jechi re oba gol'o jota gita ku cholsan re'achim. Salsao adatang dal'batgipa aganaha, 'Jongdrang, aiwa gitimo budepa saksa donga Uo bang bea tangkarang donga Hai an ching knalo uni noko nape uni tangkarangko ra e katna ' Pilakan adatangni miksongako namniktokbeaha. Budepa un walo ia saksni adasa ma'drangrangni salgipino uni nokona an tangko grongna re bina siengako jumango niksoaha Jensalo budepa tusiaoni mikrakaha, ua jikgipana aganaha, 'Buchumi, an chingo chubitchi dongkuengama?' 'Donga'ine buchuma aganchakon budepa aganaha, 'De, indakode knalo saljatchio saksni manderangna mi, dal aro be enrangko nambee song enba name tarie donsobo Saksni sokgiparang ianona sokbaarian

uamangko asongtokna aganbo aro ma'a uamangna chubitchi, mi, dāl aro be'enrangko sachibo. Pringo anga a'baona sartko ra'bite ong katanggen. Saljatchio anga uamang baksa re'bpilgen.'


"Pringgipino budepa a bao kam ka'beengachim Saruba budepani a'a sua ki'sang ki'sang uoni chel'gijaon jo ong-gukrangko am'roroe cha'amengachim Cha'ugipa saksni adasa ma'drangrangba re'bae budepako nike sing aha 'Atchu, maikosa dakpaenga na ara?' Budapa aganchakaha, 'Angderang, buchumako aro an tangko aldumittangna anga an tangan rake kam ka jaode, game-sue on na ango de-su'drangrang dongpaja Uni gimin anga bi si-kari nambrange bite kario ku'sa-rongsa cha pana-ringpana man paode mesa, mi-misi sate nipana subakgilgilpa-engachim Na simangara bachinasa re tokpaenga?" Uamang budepana aganchakaha, 'Nang ni nol onan mikson re re tokpaengachim' 'Nambejok,' budepa aganaha Indakenbi budepa mamungkoba wigijagipa an'tangni saruna aganaha, 'Saru, nokchi re ange nang ni ambiko do bipa milbatdal'batgip ko dol enba mi jahako son'e, saksni sol'giparangna tarie donsochina aganebo' Indike agane budepa saruko go'olchi rippakataha aro saruba budepani go ol todingana kene eginako ma'si-bebei gita noltangonon tongtong bilbaaha

'Aditi somoini ja'mino budepa aro saksni sol'giparang budepani nokona sokbaaha Agan-skisogimin gita buchuma song'a-rita matchot-token pilakkon tik dake donsotokaha. Ia chonbegipa saruni kattako man soarian smilbegipa aro nambegipi mi-biyak aro pilak nangarangko tarisoaniko nikon adasa ma drang saksni de gisiktangtango aiao inmane jagokaha Pilakan tarigimin aro sachigimin cha ani-ranganirangko namniktokbeaha, aro suk ong been oklae cha'tokaha. Cha'man-ring-mantokahaon uamangoni sakantian ind. kgipa do o an'tangtangmangoba dongpaode, somoi jitan cha anirangko cha pana man genchim ine gisiktangtango chanchitokaha. Budepa uamangko sing'aha, 'Dedrangrang, na simang, angona maiba nanga kamnasa re baachima?'

Uamang aganchakaha, 'Atchu, chingni nang'ona re'baade ia do'onan re'baachim.' Budepa aganaha, 'Ong'ja, dedrangrang, gipin gipinkon bi'bo, ia sarukode bi'panabe. Anga na'simangna iako on'atna man'chongmotjawa. De dongpaja, su'drang dongpaja, ian de gita su'gipa gita ching baksa dongpae chingko ka'dimeatpaenga. Iani giminsan chinga janggi tangbanga paenga.' Cha'ugiparang ia chologija-gipa do'onan gisik on'bataha aro uko man'anggijade re'angpiljawa ine chanchitokaha. Beanbebe, bon'kamao uamang budepani on'atgijakon drae rim'e ra'angaha.

"Da'ode budepani noko nikbagimin gita ua do'oko an'tangtangni kamo jakkale nina uamangna somoi sokbaaha. Pilakna skang adatang dal'batgipa an'tangni kam ka'achi do'oko ra'angaha. Pringgimik kam ka'e sal chubahaon ua loruko de'e todingdinge saruna aganaha, 'Re'ange angni jikgipako, do'o doke, mi-bijak smilding song'e chubitchiko tarie donsochina aganebo.' Saljatchi ong'e mi okkrie nokona re'bapilon ua jikgipani mi song sogija attamo cha'a bon'gija me'dik ki'sango skonga me'kam gitchaako donsoakosa nikaiaha. Okkribeahani gimin mamungkoba aganmanggija ua jikgipani on'soa me'kamkon cha'aiaha. Indaken ua do'oko gnigipa jonggipana on'ataha. Jonggipa adatango sing'aha, 'Maikai donga do'oara? Chingni nikbaa gitan kamnade cholipaama?' 'Oh, namen cholisranga. A baonin anga kobolko angni jikgipana saruo on'ataia aro kobol on'atsoa gitan angni jikgipa do'o doke mi-chi tarie chubitchiko rue donsoaia. Suk ong'been somoi gitan cha'nade man'bebeaia.' Jonggipaba adatang dal'batgipa gitan an'tangni kam ka'achin saruko ra'angenba, salchukalbaon loruko de'e dokna todingdinge saruna aganaha, 'Re'ange angni jikgipako, do'o doke mi-bijak smilding song'e, chubitchiko tarie donsochina aganebo.' Saljatchi ong'on ua nokona re'baon adatang gitan jikgipani mi song'sogija merong mangmangko chio dim'e donsoakosa nikaiaha. Okkria amjae ukon suk ong'e cha'aiaha. Uaba gittamgipa jonggipana on'atskae aro uaba apsan dake jonggipa sakgipinna on'atskae adatangrang gitan apsan biteko man'toke jonggipa chonbatgipaona sokbaaha. Saksani ja'mano saksa uamangoni pilakan togiako man'tokoa, bon'kamao jonggipa chonbatgipade togiako chakna amjae parake, ku'patangko chikspite, jaksitangko biding sale aganaha, 'Chinga budepamangmangchi togiako man'tokaha. Maina an'ching-

ara ia budepachi amako man'na nanga.' Jonggipani ka'a nange parakosa pilakan an'tangtangni apsan biteko man'aniko paraktokaha.



Picture 3. "an'ching re'angtaienba uni gamrangko ra'e katbasranggen"

"Attamsio uamang melaprue indake dakna miksonge donaha : 'Knal salo an'ching re'angtaienba budepako karomtome uni tangkarangko aro gipin gamrangkoba ra'e katbasranggen.' Ua walon budepaba jumang niktaie uamangni miksonganiko uisotaiaha. Ua uni jikgipa buchumako okame aganaha, 'Buchuma, uamang re'bataina sienga. Skango gitan knaloba mi-chi aro pilak nanganirangko tarie donsotaibo. Angni wa'kanta ja'tani gol dikkoba angni asonga sepangon donbo. Unikoa re ange noksulni demechikko dikdiksana kamiangko dakchakna pa sike rimebo. Nokni noksiko pilakba nikgijao na'a uko donnue donbo. Sokgiparangna sachimitingo na'a maibakai ga'soltapa dakmikenba sokgiparangoni saksani mipalo ga'bola dakbo. Unikode. ja'mano dakna nanga pilak kelrangkode angan dakaignok '

“Ia gimikrangko name agane on’mano pring walni budepa an’tangdo
 re’ronga gita a’baona kamtangko ka na re’angtaiaha. Adita somoi
 rangni ja’mano cha’u saksmba ua rama gitan re’bae uni kam
 ka’a a’baonan sokbataiaha. Unon budepa uamangko sing’aha,
 ‘Na’simanga bachinasa re’enga dederang?’ Uamang budepana
 aganchakaha, ‘Bachi re gen, nang’onan re’taienga chingade.’ Budepa
 aganchakaha, ‘Namjok! Indakode anga angni kamko matchota-
 rangkuna on’tisa sengtokkubo.’ Aditani ja’mano budepani kam
 matchotmano uamang damsan budepa baksan budepani nokona
 re’batokaha. Nokona sokearion buchuma uamangna skango gitan
 mi-chi aro pilak nangnikanirangko matchote ra’bae uamangni
 mikkangon sachie dontokaha. Cha’na a buchengon buchuma
 skisogimin gitan ga’soltapenba sokgiparangoni saksani mipalon ga bol-
 man’a dakmikaha. Unon budepa, gimikni nikaon wa’kanta ja’tani
 gol’dikko jako ra’e buchumako nokningchi salp’napange, pilakan
 knana gita rake rake manenga dakaha, ‘Na’a buchuma, mikgren
 dongoba nikjama? Buchuma ong’piloba sokgipako maikai mande
 ra’na nanga da’onan uikujama? Na’ara an’tangko me’tra pil’atakosa
 am’engama-indakode me’tra pil’srang!’ Indake aganenba, jikkon
 dokbebeenga ine chanchichina maibako gipan gip doka dakaha.
 Aditani ja’mano noksulni demechik talao mi-bijak ra’e sokgiparangna
 mi on’chakrap kuturiona re’ongkatbaaha. Iako nikon cha’urang ia
 montol dakani gol’dikna aiao inmantol beaha. Mairongp’lgipa
 gol’dik! Buchuma jongjongkon bilsu dambeni me tra pil’atna ama!
 Iana aiao inmantoken uamang an’tangtangni miksonge re’baakon
 gualsrangtokaha aro gol’dikkosan bi’aiaha. Budepa on’jaomangba
 ia changoba ra’sekdraen ra’angtoktaiaha.

“Nokona sokeon adatang dal batgipa chanchiaha, ‘Rakkuengoba
 angni jikgipa buchuma ong’angengaha. Angaba budepa gitan
 jiktangko me’tra pil’atsranggen.’ Indaken ua jikgipako rim’enba,
 gipan gip doke, ‘Me tra pil’bo, me’tra pil bo’, ine chrikaha. Ramam
 go’olni gol’dik ong ja, jrimbegipa rakbegipa wa kanta ja tinni
 gol’diksa, uchi gaksa dokarion bilgrigipa jikgipa a’ao ga’akaha.
 Gakgni dokatsrangon ua sisrangaha. Ua jikgipani manggisiko
 donnuenba, ‘Budepani jikgitan angni jikgipaba me’tra pil’bebejokai,’
 ine agane gol’dikko gnigipa jonggipana on’atskaaha. Adatangni
 jikgipani siaha gitan jonggipani jikgipaba me’tra pil’atna dokake
 man’en siaha. Ia gimagni biteko man’mano. on’tisaba parakgija

uaba sakgipinna aro uaba sakgipinna on'atrikriken pilakan ia apan bewalon jiktangtango gimaattokaha aro bon'kamao jonggipa chonbatgipaona so'baaha. Uade skanggipaon togiako man'mane bebe ra'ade ong'achim; indiba adatangrangni jikgiparangni me'tra ajak ajak roengo an'tangni jikgipako buchuma ong'e dongatna krat cha'nike, me'tra pilatna gisiko draatako man'e, uaba budepani gol'dikko ra'e gipan gip jikko doke aganha, 'Me'tra pil'bo, me'tra pil'bo.' Indiba da'nang, uaba adatangrang gitan jikko gimaatsrangaha! Ua duk ong'e adatangrang gita jrip dongna man'jaha; ua a'bru a'bru grapaha. Uni adatangrangba da'osa an'tangtangni jikgiparangni siani kattako donnuako duk ong'e paraktokaha. Ian ia adasa ma drangrangna dal bea dukni ong'aha! Uamang bia ka'taikuna bilsirang dugapile re'angbeaha. Da'o uamang skangna baten ka o nangbatsranga budepani tangkarangko ra'seknan chanchisrangaha. Ia changode jedakeba budepani gamrangko man'chongmotna nanga ine chingtoksrangaha.

"Da'o budepa jumang niksoe ua cha'urokrangni miksonganiko uisotaiaha. Cha'urangko togina ia chango dakni kelrangko budepa jikgipa buchumana agantaiaha, 'Buchuma, chiringsamo, boldimo tipgipa bijawal bitipko ra'a nikama? Anga ua bitipko ra'baenba gurao done gurako nokni gantio dongen Anga donnugimin tangkak'o aro uko donnuani biapko guala dake, buchuma, an'chingara an'chingni tangkarangko bano donahachina, angade gualjoksai, ine sing'on na'a indake aganbo: 'Maidakgipa budepa na'ara, aiwa a'palo gantio songdime dongipa guraoara nang ni tangka ong'jaode sanisa.' Attam ong'on cha'urang re'bajok. Uamangko nikon, budepa chubitchiko ringna a'bachengaha. Adita ringe pekmitanga dakenba budepa buchumao sing'aha, 'O buchuma, an'chinga an'chingni tangkarangko bano donjokchimsai, angade gualjokde.' Buchuma ka'o nangbee kamtango ka joljole aganataha, 'Aha, na'a budepaba, agre chubitchiko ringe, pe'e pilakkon gualtokaiaha. Gantio gurani n'ng'o na'a an'tangan doneba gualjokmade. Pilakkon gualtokaibo.' Cha'urang iako knaon, da'alde budepani tangka chingonjok ine kusi ong'bee gantio dongipa guraona re'angaha. Adatang dal batgipa a'bachenge gura ku'mang peng'ako kike dangknoke nion bijawalranga jako, mikkango aro been gimikon delt kana. Saknaa amchakjaoba ua mamungkoba agangija baten ki'sang pil'e jonggiparangona katbapitaiaha. Uni ja'mano sakgipina

re'ange guraoniko dangknokaton datang dal'batgipani man'a apsan bitekon man'e katbapilaiaha. Sakantian saknabeoba chrikjaha aro tangka chin'chome bikongkate ra'baa gitasa bijawalrangni delani saknaana bikbik jaktangtangko salongkate re'batokaiaha. Indake saksani ja'mano saksa dake jonggipa chongipaona sokbaaha. Da'o uaba kusi ong'bee jaktangko gura ning'ona, sikaton, adatangrang gitan jak, mikkang aro be'anrango ka'o nangbegipa bijawalrangchi delakosa man'aha. Pilakan gura knoke bijawalrangni delako man'mantokoa, uamang saknaa amchakjae aro duk ong'bee budepani nokko wate jripjrip be'batokaha; indiba jonggipa chonbatgipade saknaana sitengtoe, ramao grapaha, 'Aha, bilongen angade ja'o, jako, mikkango aro be'en gimikon bijarangni delako man'aha! Adarang, angade saknaan adha sia gita dakpilaha!' Unosa uni adatangrangoni pilakan an'tangtangni man'a papni biteko parakto-kaha.

"Adita salrangni ja'mano, bijarangni delani saknaa namjoko ua cha'urang budepako grongna re'taina salko-jako manchie dontaiaha. Skango gitan budepa ia changoba uamangni miksongako uisotaie namen ka'o nangbeaha; maina changni chang uamang skiako man'ahaoba da'alona kingkingba gitichi nangkamkujaenga aro uamangni namgijaoni an'pilkujaengachim. Indake dakna cholko on'anguode mikkangchiba an'piljawa ine nike ianpakode skangna bate jrimbatgipa sastiko uamangna on'na mangsonge budepa aganaha, 'Buchuma, mikkang mangmangko napattona mangmang chone pakmako rapongbo. Anga atte matbeako ra'e ua kelkini sepangon tugen. Adita na'tok soarangko ra'baenba sengna gita nokningo donbo. Unbaksana na'a jalik minarangko natkningenba chiko sepe botolo chipe, a'palo jamsengo pilakni nikraraon donbo. Jensalo uamang ianona sokbagen, na'a a'bru a'bru grapbo. Uamang maina grapa ine nang'ko sing'on, angni siani kattako agambo aro kelki gita niuchina on'bo.'



Picture 4 'Aha, na'a budepa, aiwa gantio, gurani ning'o nang'ni
tangka ong'jaode sani tangkasa.'

"Jensalo cha'ukrokrang budepani nokona sokbaaha, buchumaba
grapna a'bachengaha. Cha'urang bakan buchumani duk ong'bee
grapako nikon indake grapengani a'selko sing'aha. Unon buchuma
uamangna aganaha, 'Ah, angderang, budepa dongjajok. Da'o salsni
walsni batangjok, ua sijok; indiba uni manggisiko galna angko
dakchakgipa pilakba dengjani gimin iaron sochipatengjok. Angade
saksansa grape-mikoesa walrangkon walsengatengjok, salrangkon
re'atengjok!' Uamang sing'aha, 'Uni manggisiko banosa donaha?'
Ua grapjoljole uamangna aganaha, 'Uano. Na'simang nina skode ia
kelki gitan niuatna man'gen.' Unon dakronga gita adatang dal'batgipa
re'ange buchumani mesokatgipa kolgipu gita mikkangtangko napate
niuataha. Budepa matbegipa atteko ra'e uni gingtingko bik rasotataha.
Ua an'tangni gingtingko rim'kope, 'Ah, soa sengpiljok,' ine agane

ki'sang bitine a'palona joljol ong'katangaha. Unikoa gnigipa niuate niaha. Uaba gingting rasota man'e an'tangni gingtingko rim'kope, 'Ah, namen sengpiljok,' ine agane ki'sang bitine joljol a'palona ong'katangaha. Ia apsan bewalon uamang gimikan saksani ja'mano saksan an'tangtangni gingtingrangko gimaatokaha, indiba jensalo jonggipa chonbatgipaona sokaha. uade saknaa amchakjae chrike aganaha, 'Aiao gose, angni gingtingde bon'jok, chon'jok!' Unikoa skangrango gita adatangrangoni pilakan an'tangtangni rasongko paraktokaha. Indake uamangni a'palo jikjakengmitingon budepa nokningonin chrikwate buchumana aganataha, 'Buchuma, ia a'palo jamsengo dongipa angni nambatsranggipa samko ia skalrangna on'atnabe. Ong'jaode uamangni gingtingrang ua samko nonge nampiltokgen!' Iako knae uamang budepani jalikko sepe donchakgipa botolona chaange an'tangtangni gingtingrango nongetokaha. Uamang da'o saknaa amchakjae chrike a'boke bildodoe jikjakaha. Untal uamang mamung saloba sakgipinni gamrangna mikboke cha'utaija-waha ine mikcheta noktangtangchi katangtokaha. Uamang cha'utai-jabebejok. Kakketon re'e kakketkon dake kusi ong'e dongangtokaha.

“Chalakkigipa Budepani golpo ianon bon jok. Sal salniangengjok, na'simangba noktangtangchi re'angtokbojok ”

Buchumani golpoko bi'sarang namen namniktokbeaha aro kusi ong tokbeaha. Sal napsrangkujani gimin bi'sarang dikdiksana chio aue an'chengo kal'grikenba buchumako mitele noktangtangona kusi ong'e jakritinge, git ring'e re'bapiltokaha.



3. SKANGGIPA ROBIBAL

Ian nitogipa an'senggipa sal-Robibal sal ong'a. Pilakan ta sálo neng'taka. Cha'man-ringmane, aue-miksue rongtala ganding-chinding-rangko gane-chine songni pilakan ong'na sipile jaktangtango git aro sastrorangko gipake ku'simite, ring'jöljole dol dol dake giljaona re'angtokengachim. Gilja matchote gilja-nok sa'rao banoba sak-bonga, banoba sak-chet, aro banoba sak-chikkung tok tok dake chadengrime, ba asongtoke agangrike kusi ong'tokengachim. Indakmitingo songni bi'sarang sruksruk ong katbatoke buchumani noktop-jamdapona re'angtokaha.

Bi'sarang a'dapona ga'dapaona kingking buchumaba sikdikdik somoirango ka'dimena bi'sarangko uni ripeng ong'atahana Isolko mitelengachim.

"Salam ambi."

"Salam! Anga da'alo na'simangna SIGIMIN SEGIPA ingipa nambegipa golpoko agangen."

Ua a'bachengaha :

"TANANG, JAKPA nie manderangni rasong-kopalko agansona man'gipa mande ong'achim. Salsao uamang jiksesana me'chik bi'sa saksa atchiaha. Uamang ua me'chik bi'sako CHUMI ine bimung donaha. Ua Chumiko aro uni mikkangko nie aganaha, 'Ia bi'sani rasong namen nama : ua cha'ani-ringanina, ma'chakani nok-jamna sintina nangjawa ; indiba bia ka'ahaon, sigimin, indiba nitobegipa panteko bia ka'gen.' Ia katchi nike agansoani jikgipako jajrengatbeaha aro duk ong'atbeaha Indaken, ua bi'sako sokme kimkarongmitingon, ja'ping gambare bokgimengon, rime pagili gita nokoni sruk sruk ong'kate katsrangaha. Uchi-ichi uigijagipa biapo re jojo-re'brangbrangani adita somoini ja mano uamang chonbegipa gitim damsana sokbaaha. Uamang uano mande saksani noko walsa waltuarian uamangni brangroroaniko a'bachengattaiaha. Ia chango uamang ma'ningsa uamangni ramaoni brange diltubegipa burung-bolgrimo re roroaha. Miksonga nisan gri uamang salni ja'dilko, jani teng'ako nikna man'pilgija ka sinjrim re'rudam a'kongo regrip a'kawee, andalsim budugrop bolgrimo brangreroon, Chumi neag'a aro okkria

amchakjae grapaha. Ua chi ringna sikbeahachim. Knaoba knagija dake, nikoba nikkija dake, ringna ske ku'gap ku'gap dake tang'roro- tang'brangbrang dake ma'ani jako rim'dingdinge oksambengo ja'rik- enggipa Chumiko basakobara de'tome aro basakobara ja'achi re ate saljojoe okkriana bolbite, ringna skana chiring-chibisikko am'jojoe re'angroroaha; indiba mande-matchuni songdong-a'chaani mamung chinkoba pilakoba nikjachim. Bon'kamao uamang diltubegipa bol- grimni jatchio dal'begipa kilako aro uni ning'o nitobegipa rajani dongram nokko nikaha. Uamang ua kilani cholgugaona re'ange, mandeba ong'chong, skalba ong'chong uano donggipa je jangginaba chrike okamaha; indiba uamangni okamanina pilakni ku'chakani ku'rang dongjachim. Chumi chi ringna sikbee gitok ran'e sina sipilengachim. Chakchiko amchakjae, sengo sengnapjae, ua nokni



Picture 5. "Uamang burung bolgrimni jatchio dal'begipa kilako nikaha."

a'gilaakoniko gimaatna sikjae diltubegipa burung-bolgrimo, ia biapo, nokko rikenba apa angko donaha. Cha'ani-ringanina agreba angni tangpilo angna nanggnipipa pilak bosturangkon ua iano' donaha. Bilsio changprak pangnan apa angko grongna ianona re'baronga. Angoniko cha'ue man'gipa ripokko angni ma'detang pangnan salni somoio ganronga, indiba attam sokarion ua uko oke, gurao chiko gapate uni ning'o donronga. Uni gitokoniko ua ripokko okarion anga tangpilronga aro pring seng'e ua ripokko gantaiahaon, anga sitaironga. Walni somoio anga tangpilronggenchimoba, ia diltubegipa aro bakrobegipa burung-bolgrimko re'e angni pagipaona songrena angna namen kenbeani ong'a. Uni gimin pangnan anga ianon dongkamna nangaia Angni ripokko man'pilna saoba angko dakchakpaosamungl'

"Segipani golpoko knahaon, Chumi segipani ripokko ranioniko man'pilna maiba cholko dake jotton ka'e nina chanchiaha. Pringsao ua an'tangni demechik bi sako jakpongo ra'e rajani dongram nokona re'baaha. Jensalo ua rajani dongram biapona sokbaaha, saoba ka'sachakgipa dongpaode nokkol nape dongpana ua am aha. Raniona ua rimangako man'on ia nitobegipa me'chik aro uni daknanggipa demechik bi'sako nike rani namen ka'sachakbee aro namnikbee, una an'tangni ba'rarangko su'ani aro cha chak-ringchakan bosturangko su'galani kamko on'e rakkiaha. Amadipet Chumi rongtale aro name pilak kamrangon raniko kusi ong'atna aro namnikatna jotton ka'aha. Indakoba ua salantian walantian an'tangni mikgronko ranini gitoko gangipa an tangni segipani ripokon donkamaha. Salsao rani Chumiko an'tangni skooniko, bokangenggipa knirangko am'e tete galchina ge'etaha. Ua ranini skooniko kni gipokrangko am'engmitingo Chumi an'tangni bi sako raken se'etaha. Unon bi'sa saknaana grapbeaha. Rani iako nike maina grapenga ine uo sing'aha. Ua aganchakaha, 'Mamungba ong ja Rani, angni bi'sa nangni gitoko gangipa nitobegipa ripokko nike uko kal na bi'engasa.' Rani an'tangni ripokko una on'na sikjae, uni grapako namatna mangmang gipin nitogipa kal'anirangko ra'bae una on'aha. Chumi arobatai bi satangko raken se'ettaie grapattaiaha. Rani an'tangko kni tetako dontongatna sikjae, uni grapako mittakna gita an'tangui ripokko oke bi'sana kal'china on'aha. Attam sokbaon me'chik ripokko ran'nan on'pile kamtangko matchote an'tangni dongramchinan re'angpilaha. Indaken Chumi ru'uta salrangna kakketkon dakronga uano salrangko re'ataha. Uni kakketaniko nike rani una namen ka'dongchakaha aro kenchakani

gri salantian an'tangko ma'gipani kni tetmiting somirango bi'sana kal'china an'tangni ripokko on'rongaha. Salsao bi'sa ranini ripokko kal'e roengmiting rani dikdiksana nokningchi napangaha. Chumi nambegipa cholko man'e ripokko ra'e burungona ta'aken katangaha. Ua nokkol me'chik an'tangni ripokko ra'e katangaha ine uim rani an'tangni nokkolrangko watate ua nokkol me'chikko rim'e rimhapil-china ge'etaha; indiba Chumide burung bolgrimona soke noktangtang-ona sokna salsa adhani ramako re'na nangalahachim.



"Me'chik noktangona sokbae, ripokko segipani gitoko patataha. Unon ua siaoni chakataha. Da'o uamang jik aro se mamung jajrengani gri dongna man aha. Uamang uamangni nitobegipa nokni samtangtango pulni nitobegipa baganrangko dake, skangna bate uamangni nokko nitobatataha. Ru'utbea salrangni ja'mano, salsao, uni pagipa raja, re'barong a gita uni dapanteni manggisiko nina duk ong'e re'baengachim. Nokni samtangtango nitogipa pulni baganrangko aro depanteni tangpile, bia ka'e dongako nikon ua namen aiao inmanbeaha aro kusi ong'beaha. Ua uni depanteko ka'sanenggija duko galonaha ine uimanahaoa raniko namen ka'o nangbeaha aro uko jringjrotna nokoniko burung-bolgrimona rikgalataha. Raja uni ka'sagipa depante aro uni jikgipa aro uamangni de bi'sako noktangona rimnappile, ka'sagrike kusi ong'en salrangko re'ataha.

"Golpo ianon bon'aha." Dikdiksani ja'mano—

"Sonibal sal na'simangna chuti ong'oba angna kamni sal ong'a Nambatgipa salde Robibal salan ong'a. Uni gimin Robibal changan. tlen na'simang giljani ja'mano ma'a-paarango bi'e re'barongbo. Sruksruk dakaniara ma'a-paava bamgiljaniko mesoka aro uko ranta ka'aniara pap ong'a."

"Indakode ambi, chinga da'alo pap ka'aha; maina chinga pilakan sruksruksa katbaaha."

"Mamungba ong'ja, na'simang ma'a-paatangtango kema bi'bo Uamang kema ka'tokgen."

Indaken buchuma aro bi sarang ekgrikaha.



4. GNIGIPA ROBIBAL

Buchumani su'ugipa golporangko knamane bi'sarang salsani ja'mano salsa buchumako namnikbatna a'bachengbaaha. Indaken, buchumani golporangchi muni nangatako man'e saldokkon ru'utdugani-kaha aro basakon robibal sal ong'taignok ukosan sengtokaiaha. Saldokni salrang uamangna ru'utdugahaoba jene tene salrangko badiataha-da'o robibal sal ong'taiaha. Seng'guang aue-miksue, gilja matchoto bi'sarang re'baronga gita kusi ong'bee re'batokaha. Buchumaba kusi ong'been uamangko rimchaksoaha. Adita agangrikani ja'mano buchuma RUNSA minggipa me'chik bi'sa saksani golpoko a'bachengaha :

'BADIABA DILTUBEGIPA a'bri—manduni jatchio, badiaba chasongo, chonbegipa gitim damsa dongachim. Ua gitimo adasa ma'drang sakbri aro uamangni saksa kam'kam nogipa dongacnim Uamang an'tangtangni gisepo namen ka'sagriktokbeachim, indiba uamangni ka'sabatsranggipara, uamangni nogipaan ong'achim. Ua namen nitobegipa me'chik bi'sa ong'achim. Uni bimung RUNSA ong'achim. Uaba an tangni adatangrangna namen ka'sabeachim aro uamangni pilak agana kattarangkon knachake, ge'etarngkon manie, uamangko kusi ong'atachim Adabri me'a bi'sarang, basakoba, maibani gimin kajia nangoba aro an tangtangni gisepo dakgrik-dokgriktokoba, mamung saloba, mamungchiba nogipa Runsana dukko aro saknaaniko on'jachim- namen ka sabatteachim. Ambo amjabo, an'tangtangni ge'etana jegitako dakoba uamang nogipani kamna kusi ong'toka aro chu ongniktokaiachim.

"Bilsirang re'angahaon ua adasa sakbrian bia ka'toke jikgiparangko rimbatoke apsan nokon dongdi'tokaha. Indaken uamangni noko pangnan kajia ong'kamaiaha. Namchik re baani adita salrangna ia sakbri namchikrang pilakan salgni sa'grerang gita namtokachim, indiba uamangni ka'sangrkaniki dikd ksanasan baiaiaha; maina uamang setangtangni nogipana ka'sabeako nikon. chongipa bitchri gita uamangni ka'tongrango mikbuani aro mitchinikani namgijagipa papni chonbegipa bitchriko dal'rorona jakgitel on'aha: Uamang salsani ja'mano salsa mitchinikbatroroe aro mikbubatrroe, ben'kamao ninan siktoksrangjaha. Chol man'an salode uamang Runsana gimagni maiba kamkon dakna gis'ik tangtango chingtoksrangaha.

“Ka'tongo aro bimango nitobegipa, dos grigipa, sontol me'chikko uamang namen mitchitokbeaha. Daktogijagipa kamrangko uamang ua bi'sana dakna on'rongaha; indakoba iani gimin uamangni segiparang uijana gita uamang namen gisik raktokbeaha. Setangtangni mikkango uamang una ka'samike, nokni chonbea kamrangmangmangkoba dangdikna on'jaha; indiba uamang nokoni ong'katangarion, saksu, Nokning aro a'pal gimikkon bakbak itrokbo,' sakgipin gnigipa bochitang, 'Bason-batirangko su'galbo,' sakgipin gittamgipa bochitang, 'Cha'na mangmang choliaigipa me'chik bi'sa, redingo dongipa angni ba'rarangko bakbak su'tokbo da'on sal rakenga,' aro sakgipin brigipa bochitangara, 'Da'on seng'gnang mi-bijak song'bo,' ine uamangoni pilakan an'tangtangni nangnika kamrangko mesokbingbange ge'ete sasti on'rongachim.

“Da'nang me'chik bi'sa! bochitang sakantini ge etana uchi-ichi katurae, uana iana ka'e, sakantikona namnikatna jotton ka'rongaha. Badiaba daktogijagipa kamrangko bil-jak chu'ongpajae uamangni ska gita dake on'na man'jaode, pil'nipil ku'mitchia kattarangchi manengrongachim. Una Runsa duk ong'e grapode, duragni rakbatgipa kamrangko ge'etdaprangachim. Adatang sakbrini kamoni re bapilosa, Runsaba ia namgijagipa me'chikrangni dukchi sin jetaoni jakgitelaniko aro ka'dimeaniko man'ajachim!

“Salantian adatangrang re bapilna adha kontona skangmarumarsa bochitangrang Runsako auna miksura chiringchi watatrongaiachim aro aue miksue rongtalate adatangrangni nokona sokbaana sengsoatrongachim. Runsao namen nambegipa dakbewal mingsa dongachim, jenana, namjaoba bochitangrang uko mittelpilrongachim aro ua dakbewalara, jegita bochitangrang uko salni somoio adatangrangni donggijao sasti on'gcnchimoba uani gimin on'tisaba adatangrangna agannangjachim. Ua antangni dukko on'tisaba adatangrangna uiatjachim. Salni somoio chaktogijagipa dukrangko bochitang sakbrioniko man'oba, attan soke noktangona re bapilon, Runsa adatangrangko kusian gape, ka'dingsmitsmit ka'sariri kurangrangchi, rinok rinok agane, sakantikona ku'dime rimchaksorongachim. Adatangrangna salgimiko ding'ol-gramchie kam ka'e. neng'skime re baoba, ia rinok rinok kurangchi rimchaksogipa Runsani mikkangko nikarion, balsrang dake uamangni neng'skimarangko gualtokaiachim. Ia chonbegipa ka'tongni ning'o dal'bea dukni gnangoba, uni chakchikanichi, aro

nambegipa bewalchin uamangni nokdango katchaanide bon'changskajachim.



Picture 7. "Mese jakstemko ra'baenba Runsani ja'kokkimao donenita."

"Changsao adatang sakbri maiba kamrangni gimin nokko-jamko wate gipin biapchina adita salrangna songreani ong'aha. Nama kamna uamangni nokko-jamko wate re'angon, ia denggugipa jikgiparang, Runsako dal'e sasti on na aro uni gimagnina nambegipa chol dakesa ra'skaaha. Uamang dane dongimin megap tombolko mesoke aganaha,

'Nang.ni adatang dal'gipa ia me'gap tombolon uni sonani jakstemko gimaataha. Bakbak na'a uko am'e, man'e chingna on'bo.' Indake agane uamang nokona re'angtokaha.

"Ian chubegipa tombol ong'achim. Runsa ia chubegipa tombolko nigitoe, bochitangrangni una dakna on'a kam uni bilni nalsao ong'a ine uie namen duk ong'beaha. Beben, ia tombolo uni adatang jakstemko gimaatbebeoba ia chonbegipa Runsa maiko dake ia jakstemko man'pilgenchim! Iako chanchien Runsa duk ong'bee grapaha. Rang'gitik ua me'gapni ning'o maibani sek-sak, sek-sak ine gam'ako knaaha. Mikchitangko usite knatime dongani dikdiksani ja'mano uni chadengenggipa biapon, me'gap ning'o bikgil bikgil me'gapni il'engako nikaha. Adita nie dongon, uni jakrani ja'ani ja'pao ka'jik ka'jik maibachi nangataha. Ja'atangko saljite nion ua mangsa dal'begipa meseko nikaha. Ua mese a palona ong'kate Runsako nitataha. Uko ku'sim ku'sim ka'dingsmite ka'dimeani maiba kattako aganenga gita nikachim. Dikdiksa nitate mese bakan me'gap ning'chi napangpilaha. Saljatchi ong'on mese ong'katbataiaha. Ua gimagimin jakstemko chikkape re'baenba Runsani ja kokkimao done a'koltangchin napangpilaha. Kusi ong'bee Runsa jakstemko uni bochitang dal'batgipana on aha.

"Salgipino ia denggugipa jikgiparang dandarere chong'e dongimin nakgimin miko mesoke Runsana aganaha, 'Ia mirangko bebu-birong basee birongrangko jamo chiipe donbo.'

"Chong'darere danne dongimin nakgimin miko nitate, uni ka'na ama bilni nalsao ong'a ine nike Runsa grapaha. Rang'gitik adita do'sirang sakoni bilone, dane dongimin miona ong'kataha. Dikdiksa-non do'sirangni giminan mikon nikpiljaha. Do'sirang pilakan miko suroktokaha. A'bachengo Runsa uarang mirangko cha'tokenga ine chanchie namen gisik rakbeaha, indiba sepangbate re'bae name nion uarangoni mangsaba migil rongsakoba minokgija bebu-birong damsan chong'e donrimaoniko, birongrangko baseenga ine nikaha. Bebu birong basee matchotmano do'sirang pilakan bile katangtokaha. Do'sirangni bile katangani ja'mano Runsa basegim'n birongrangko jamona rikae done matchottokaha. Runsako sasti on'na mamung ja'gipuatani cholko dake man'jae bo'chitangrang namen namnikja-beaha.

“Gittangipa salo, ia rinok rinok katta ra'begipa bi'sa Runsako ja'gipuatna maiba gipin gitalgipa cholko man'chipjaen salko indin re'atna nangaiaha aro Runsaba salgimikan suk ong'e neng'takna man'aha. Indiba brigipa salo uamang cup ge'sako Runsana on'e aganaha, 'Songjinmani salaramchipako, burung-bolgrimni jatchio saksu sainasi gnang. Na'a uona re'ange, sakgipinrangna uni on'ronga sam-bitchiko bi'e ra'babo, chinga pilakan mikgron satokenga, indiba gisik ra'bo, sal napna skangan na'a nokona sokbapilna nanga.'

“Sal napna skangan nokona Runsa sokbana nangani ortoara, ua salon, nokko-jamko wate re'anggipa adatangrang nokona sokbapilto-kengachim. Runsa cupko jako ra'e nokoni ong'kate bochitangrangni agangipa burung bolgrimchi re'na re'chakatbaaha. Ua namen ka'o nangbeaha; maina uni bochitangrang salrikkiton uni gimagninasa cholko am'rikkittokaiachim. Uamangni on'a sastioni aro pilak dukrangoni jokna maiba choloko dakna ua chanchiaha.

“Ua bochitangrangni mesokatgipa diltubegipa, kenbegnigipa burung-bolgrimchi sainasini nokona re'anggija sepangbegipa aro mamung kenani grigipa burungsamonasa re'ange, den'e nio rimita ine n.kgipa je bolni ja'dilrangkoba chimonge, dokkninge chiko sepenba cupo ra'e ua noktangona bochitangrangona re'bapilaha.

“Nokona re'bapilmitingo burung-bolgrimko badee gittimni bangbanggipa bakraona sokmangmangarion ua uni adatang sakbrini re'baengako niksoaha. Kusi ong'bee, ka'dingimite ua adatang sakbrikon ku dime salam ka'aha. Uchi adatangrangde ia kenbegnigipa biapo nogipani roako nikon aiao inmanbeengachim. 'Na'a maina ia biapona re'baaha, nono?' uamang sing'aha.

‘Dadarang’, ua ka'sariri aganchakaha, 'na simangni jikgiparang, bochirang mikgron saako man'tokenga. Burung bolgrimni jatchio donggipa sainasiona re'ange sam-bitchiko ra'echina angko aganahana anga re'baaha.'

“Uamang pilakan nokona re`bapiltokaha. An`tangtangni donngue Runsani gimagnina, kenbegnigipa biapona watatao, adatangran baksa uni re bapilon, ua denggugipa jikgiparang baditan aiao inmansobeengen aro kensobeenggenchim. Uamangni donggijao, Rupsako ka`saninggija jakkalanirangko adatangrangna agane on`ode uamangna maian ong pilgenchim! Indiba uamangna namen kusini, je,



Picture 8. “...uarangoni mangsaba migil rongsakoba minokgija birongrangkosa baseenga ine ua nikaha.”

Runsa iarangni gimin on`tisaba adatangrangna aganjtha. Nokona sokarion segiparang pilakan uamangni jikgiparangko gronge aganaha. ‘Na`simang pilakan mikgron satokenga ine nono Runsa aganaha Da`o maikai dongoha? Niboching, na simangni agangipa samko ua ra`baaha. Na`simang dan`dantokbo, Runsa na`simangni mikgron-rango ua samko ruatchina.’

“Da`o jikgiparang maiko dakna man`kua! Sajaoba uamang an.tangtangni togiako rim`a man na kene saknabea dake tue donga daktokaha aro an`tangtangni mikgronrango uni ra`bagipa sam-bitchiko ruatchina Runsako aganaha. Uamang sakantini mikgronrango Runsa


uni ra bagipa samko on'tiprak ruattokaha. Dikdiksani ja'manon, Runsani gimagnina cholko am'rikkite togigipa denggugipa jikgiparangni mikgronrang sabebesrangna a'bachengaha. Indita salrang batangahaoba uamangni mikgronrangni saknaanirang namani pal salsani ja mano salsa on'tiprak batroraaha aro ja'man ki'tiko bilongsrangaha Iarangan ong'aia, uamangni mikgronrang delmruro-roaha. Namgipa ojarangko rimbae jikgiparangko sanatoba mamung nama biteko man'jaha. Bon'kamao uamang sakbrian chu'gimik kana ong toksrangaha.

"Mikbuani gisikan gapgipa ia denggugipa jikgiparang uamangni pagipa-ma'giparangona re'angpiltoke an'tangtangni namgijagipa lamrangna krat cha'e pangnaba setangtangona re bapiltokjaha, indiba ia kakketgipa, rinok rinok dakgipa sontolgipa me'chik bi'sa Runsade adatangrang baksan tom'tomen dongangaha."

Bi'sarang golpoko su'uniktokbeaha aro golpo bon'ahaomangba, muni pua gita jikjakgija, goka ong'a gita siksakgija gisiko nangbeen buchumako nitatkuengachim.

"Golpo ianon bon'aha."

"Isolo dongkamgipa pangnaba ga'akja. Boচিতrangrang rokomanti kamrangchi sasti on'oba Isol una dakchakaha aro pangnan dakchak chong'motgen ine Runsa ka'dongaha. Uandaken, kragija bewal aro mitchigipa kamrangchi Runsako gimaatna dakanirang pilakan Rursao nangjaha : Isol uarang pilakkon denggugip boচিতrangrangonan pil'argataha ; maina 'A jak soka Angnisa' ine Isol agana. Uni gimin ra'timangba pilakan ia namgipa Runsa gita ong'tokbo," ine bon kame ku'pattie noktangtangchi watatpiltokaha.



5. GITTAMGIPA ROBIBAL

Bi'sarangni kusi ong'bee sengsoenggipa, an'sengbegipa sal Robibal sal pil'satae da'alo re'bataiaha! Robibal salo uamang seng'gnang auna, rongtala ganding-chindingrangko ganna, Sunday skulchi re'na aro uni ja'mano giljachi re'naba nangachim. Bi'sarang pilakan sunday skul jokmano bakrao tom'dake buchumani agangipa Runsa minggipa me'chik bi'sani aro gipin golporangni gimin agangriktokengachim. Uamang inditan gisiko nangbeaha, je, uamang an'tangtangni dakna nanga pilak kamrangkon gualtokpilsranganachim.

"Ding, Dong!" ka'siriri chowkidar giljani kontako dokataha! Da'osa bi'sarang noktaugtangona katbildangtokaha!

Re'baronga gita bi'sarang gilja matchoto buchumani noktop jamdapon re'bataiaha. Dikdiksa golpa ka'ani ja'mano bucliuma. 'GURASNI SONANI TANGKARANG" ingipa golpoko aganna a'bachengaha:

"SONG DAMSAO saksa napit dongachim. Kangalbea, indiba ua pilaknan kakketkon deko, jikko dake aldue chongipa noktop dongdilachim. Pangnaba ua mamungkoba sakgipinoniko togie ra'jachim. Dongan salode ua an tango donga jekoba jaksrame on'grik-sagrike noksul-nokripenrang baksa nangrim-melie dongachim. Bang'pajaoba an'tang man'aonikon ua jikko-deko kraen cha'dilaringdilachim. Uni bi'sarang namen an senggiparang ong'achim.

'Salsao, ua a'songni raja napitko an'tangni nokona re'baataha. Okamako man'e rajani nokona re'bahaon, raja una aganaha, 'Na angna kam ka'na nanggen. 'Nang'ni kamni dormahana anga nang'ne japrako jolasa tangkarangko on'gen. Na'a chu'oungnikgenma? Napit kusi ong'bee aganchakaha, 'Anggita cholipagijagipa mandena, nang'n jaksrambee on'ania angna chu'ongana baten ong'aha, maharaja. Indaken ua salgipinonintal rajana kam ka'na mamnike tik ong'manaha Napit kusi ong'bee nokona re'bapile jikgipana aganeaha, 'An'tangna kam ka'na raja angko seokaha! A'gilsako haida angan darangmarangna bate katchabatsranggipa mande ong'gnokkon!

"Salgipino, napit rajana kamko ka'na a'bachengaha. Rajan noko uni kamara, rajani knirangko tariani aro uni ku'simangke

rokanian ong'achim. Dikdiksa salrangni gisepon ua an'tangni changa-sapanichi rajako namen namnikatbeaha. Raja una namen ka'sabeaha aro salantian ua napitni kusi ong'bee ka'dingsmitani mikkangko nike namen kusi ong'beaha. Salantian ua raja baksa agangrikna aro golpo ka'na man'anina rasong chabeaha indakoba ua gaora dakjachim.

"Indaken, walsao ua diltubcgipa burung-bolgrimui ramako re'ang-engachim. Wal namen andalbea aro sikdikdik dakachim. Unon rang'gitik bol pangsaoni ku rang ong'katbaaha, 'O napit, dikdiksa dongdikkubol' Ia ku rangara ua bolo donggipa kubelni ku'rang ong'achim. Napit bakan dongdikaha. Kubel aganaha, 'Angan ia bolo donggipa nang ni ripeng kubel ong'a. Anga nang'na gurasni sonani tangkarangko on'na namnikengachim. Na'a ra'chakpagenma?' Napit dikdiksana jaja, jiji dake, bon kamao aganchakaha, 'Oe anga kusi ong'been ra'chakgen!' Kubel una agantaiaha, 'Indakode na'a noktangona re'angpilbo. Na'a uarangko noko nikegen.'

"Bakan napit noktangona gong'rake daaribaaha. Nokhona soke nokningo napmangarion jikgipa chrike aganaha, 'Ah! Tik somolon na'a sokbaaha. Da'osamangmang anga ia gurarangko nikaha. Iarang maidake ia biapona sokbaaha anga uija!' Iarangko angni ripeng angnan on'aha. Gurarangni ning'o maiarangsang danga takbak oprake nibo,' napit skete aganaha. Ge'sni gurarangko oprake nion uamang aiao inman ile jagoke aganaha, 'Gurasni sonani tangkarang! pilaka, gapsuaka!' Jikgipaba ge'sni guraranganikon sulsul nie, bon'kamgipa snigipa gurao adhasan nike aganaha, 'Gimikonde gape dongja, ia ge'sagipaode adhasan dongala.' 'Ge'sao adhasan? Indiba angni ripeng kubelde gurasni gape danga ine aganachim!' napit aganaha. 'Mamungba ong'ja,' jikgipa aganaha. Indioa napit gisiko chu'ongoikjae aganaha, 'Ong'ja, gura ge'doko gape, ge'sagipao adhasan, dongaiania nitoja. Uni gimin an'ching ia adhasan dongaigipaoba gapatsrangna. An'chingo danga tangka pilakkon ra'batokbo'.



Picture 9. "Gimikonde gape dongja, ia ge'saode adhasan dongala!"

"Nokdangko chalaina an'tangni jikgipana on'a pilak tangki-rangk'on ra'baattoke, adhasan dongaigipa snigipa gurao pakataha, indiba uan uan apsanne dongaiachim. Napit jikzipako acanaha, 'Angni palango, balis mitapo jolagni tangkarang donga, uarangko ra'batokbo.' Bils'i gittam ba .bilsibri rajani noko kam ka'e man'paako chimonge donna tangkarangkoba ua snigipa gurao braataha, indiba chepaba chepgija, gapaba gapgija, uan uan oongaiachim. Iana napit aiao imanbeaha. Ia snigipa gurako gapatna jotton ka'e uhi janggi tangbaa gimiko chimonggipa pilak tangkarang bon'tokaha, indakoba gapatna uni skaniko dontongatna man'jaha. Ua an'tangni songsul-nokripengrangona re'ange mol'molaha, 'Anga ia jaode bilongen koros aptek ong'beenga. Ka'sapae na'a angia adita tangkarargko ia'srona on'pana man'genma?' Iana aiao inmanpile uni ripengrangoni pilakan uko sing'aha, 'Na'a mai ong'aha? Pangnaba na'a pilakoba ra'chak-

ra'srorongpajachim ! Jeba ong'china anga nang'ni bi'a gita nang'na angni on'na bil ama gita ra'srona on'gen.'

"Ripengni on'ata tangkarangko pakateba snigipa gurao gapatna amjaengachim. Indaken, napit rajani nokona re'ange rajao mol'mole aganaha, 'Maharaja, chonbegipa nokdangsan ong'aioba, a'gilsakni dintangrorobaengani kri angni man'paa tangkachi nokdangko chalaina namen neng'beani ong'a. Na'a ka'sapaode, angko dakchak-pana man'genma ?' Raja bakan uni dukni mikkangko nike, maiba dukni una donga ine ma'sie aganaha, 'Anga ma'sia ! Anga pilakkon ma'siaha, na'a duk ong'nabe ! Ia jaonindipet anga nang'ni dormahako jolasaoniko jolagniona tang'doatgnok ! Napit bang'bea tangkarangko chimongenba snigipa gurao pakatna tariaba, indiba uni pakatna dakmangmangendon uni jikgipa nikchange aganaha, 'Da'moku ! pilakkonde pakatkunabe ! Anga adita merong-mechu aro sam'jak me surangku brena tangkarangko nangenga.' Indiba, adhasan dongaigipa gurao gapatna skanian jikgipani mol'molanina bate una dal batachim. Indaken jikgipana nachil songgija, pilakkon gurao pakattokaiaha. Indakoba, indita pakatara, pakatja gita uan uan skangoni gita apsan dakaiachim. Napitni skani uko ching'chaatbeaha. Ua aganaha, 'Anga dontongjawa ! Nang'o donga pilak sonarangko ra babo.' Da'nang ! snigipa gurachi muni nangatako man'gipa napit, ka'saninggija dake jikgipani pilak sonani aro gipin gamchatbegipa ro'ongrangni gandingrangko ra'e palaha. Indiba pale man'gimn bang bea tangkarangmangmangba ia snigipa gurako gapatna man'jaha. Ia adhasan dongaipipa gurao gapatna uni skani skangna bate uni ka'tonglo bilakbataha. Ian uko pagla ong'ataha ! Uni gisik tom'tom-jaha ! Ia gurasani ku'mangona gapatgijade ua dontongna sikjaha !

"Gurasni sonani tangkarangko kubeloniko man'e snigipa gapgi-jagipa gurao gapatna jotton ka'chuchuen, uni nokdang rurongna a bachengaha ! Noko cha'ani bon'na a'bachengaha ! Rajani nokona re'baani somoi tik ong'rongjaha ! Cha'ani-ringanirang chu ongpajae, jik'deni obostarang skango gita ong'jaha ! Ia tom'tombegipa aro an'senggipa nokdango, bi'sarang okkriana jikjak jikjak grapna a bachengaha ! Okkrioba maiko dakkuna ! Grapoba maikai mittakuna, uamangni gam gimikkon snigipa guraan minoktokaha ! Ia gurani a'selan tuo tusiksakaiaha, ka o ka'siksakaiaha ! Basakoba basakobade ua walgimiko minitsaba tusigija gurako gapatani cholni giminsan chan-

chiaiaha. Salsao ua noko dongspa matchu mangsako palsrange, bang'a tangkarangko man'e gurao pakataha, indakoba uan uan dongaiachim. Pelsa ba pelgni uni man'paa pilak tangkarang ua guraonan tongtong sokangaiaha, indakoba mamung namgni grichim! Ia gurako gapatna man'jae ua gisiktango an'tangko a'gilsako kusi ong'jabatsranggipa mande ine chanchiaha!

"Ia pilak salrango raja uni mikkangko nie dongengachim. Salsao raja uni ka'sagipa napitna aganaha, 'Napit da'o na'a japraiko jol gni tangkarangko man'paenga. Jolasako man'mitingon nang'ko kusi ong'e nikachim. Indiba da'o nang'ni mikkango dukni chinan gimaj. Nang'ko mainaba duk ong'teenga gita nika. Maibakai na'a gurasni tangkarangko man'manahama?' Unon bakan napit gurasni tangkarangni gimn knaon aiao inmanbee sing'aha, 'Gurasni sonani tangkarangko man'aha ine na'a maikai ma'sia, maharaja?' 'Nang'ni mikkango dukni aro chu'ongnikgijani chinko nien, gurasni sonani tangkarangko na a man'aha ine anga bebe ra'a. Walsao anga burung-bolgrimni ramako salsan re'angenachim. Unon kubel mangsa ua gurani sonani tangkarangko on'aha! Anga ua tangkarangko jakkalboma ba chimonge donnue doaboma ine uo sing'aha.' Rajani agana bon'kujaon napit sengnapjae rajao sing'aha, 'Unosara maiko aganchakaha, maharaja?' 'Mamungkoba aganchakja, ua bakan katangaiaha. maina an'tangko uiaha ine ua ma'siaha. Kubel namen chalakkigipa, manderangko togigipa ong'a. Gura gesnioni snigipa gurade CHU'ONGNIKGIJANI gurasni ong'a. Sonana uni okkriani mamungsaloba on'tisaba bon'changdikja.' Rajaoniko ia kattarangko knaon napit skimaha, 'Mairongpile anga jara dakbeaha! Ua burung-bolgrimona re'ange, je biapo ua kubelko grongahachim, ua biapo chadenge aganaha, 'O kubel, nang'ni gurarangko ra'pilbo, anga nang ko mol mola! Angan uarangko nangjaha!' 'Nambejok. Na a nokona re angpilbo. Nang'ni ska gitan anga uarangko ra'pilaha.' kubel aginaha.



Picture 10. "Gamrang gimaangtokahaoba an'ching pilakan tangtokpa-kuenga!"

'Re'bapile nokona soke noko napeon, ge.sni gurarangko nikejae, aganaha, 'Pilakan gimaangtokaha! Angni chimonggimin gamrang-mangmangkoba pilakkon ra'angtokaha!; Neng'bee chimonggimin gamrangko indin gimaatahana jikgipa duk ong'bee grapaha. 'Mamungba ong'ja. Ian an'chingna mikkangchina mikrakatsoani gitasan ong'aia. Gamrang gimaangtokahaoba an'ching pilakan tangtokenga, anga da'oba kusi ong'kuenga. Hai an'ching an'tangtangni bang'pagija man'aon kusi ong'na aro chu'ongnikna. Indake uamang jik aro seni gisepo ka'dimegrike skango gitan kusi ong'e janggi tanganiko a ba-chengataha."

'Golpo ianon bon'aha."

"Ia golpo na'simangni nachilkolna knatobegipa golpesan ong'aia, indiba nambegipa skidapani golpoba ong a. Indakode ia golpooniko na'simang maiko skie ra'manaha aganboching."

"Mikbokani aro chu'ongnikgijaniara gimaanisan ong'a," bi'sa saksa aganchakaha.

"De, Japraiko jelasa tangkarangko man'e napit hang'bea tangkarangko chimongaha. Chu'onga gitan tangkarang an'tango dongaha. oba napit kubelni on'a tangkarangkoba man'dapna sikbeaha. Indaken bon'kamao ia namgipa aro kakketgipa napit kubeloniko man'gipa tangkarangko gimaatasan ong'aigija, uni mikboke aro chu'ongnikgija dakachin an'tango donga pilakkoba gimaatsrangaha. Uni gimín na simangba pangan man'atang-dongatagon chu'ongniknangana'"

Indaken buchuma aro bi'sarang ekgriktaiana.



6. BRIGIPA ROBIBAL

Robibal sal! Indiba bi'sarangna dukni! Buchuma be'en an'sengjaenga! Ua biaptangon tue dongenga! Bi'sarang buchumani samtangtango asonge an'tangtangari golpoe rotokenga. Indakmitingo sakni bi'sarang- Tim arb Timpamangde chisamo beigongo asonge mikkanggrike saksa sakgiplinna batna krengesa tol'e golpo agansa-engachim.

"Nang'ni bilsi badita ong jok?" Tim sing'aha.

"Da'alko channe da'o angni bilsi bilsi sotskusku ong'jok. Nang'ni bilsiara badita ong'jok?,"

"Angni bilsi ritchasa sotbonga ong'jok," Tim aganchakaha. "Miniode anga mama Rakman gitan namen dal'ahachim, indiba da'ode chontaipiljok "

"Angaba miniode chonachim, da'o dal'aha, unikode anga da'ode chonpiltaiaha. Indiba anga bakbakan tal'taigen."

"Skango anga dal'ode ia chibimakode jrosotna amachim," Tim aganaha.

"Huh! Angade songdu chibimakon jrosotna ama."

"Jade maimangmang! Angade sagalkon jrosotna amaia.,"

"Angade bilnaba changa!"

"De indakoe bile niboching!"

"Ong'ja. Da'ode man jaha. Maidake tilna nanga gualaha."

"Changsao anga jrosotengachim." Tim aganaha, "unno mangsa dal'begipa na'tok angko rikongaha. Anga bakan ga'tingdataha, indakoba ua na'tok angni skoko chiksotaha."

"Tol'asa na'ade!"

"Tol'ja!"

,"Indakode na'a maikaisa sijajok!"

"Maidake sigen? Anga a'gaona jrobaenba nokchi re'bapilaha."

"Sko grian?"

"Oe. Mainasa skokoara nangpagnok?"

"Sko dongjaode maidake nokona re'bana man'pagnok?"

"Indaken re'baafok. Sko dongjaoba re'nade man'aiaba."

"Da'oara nang'o sko dongake!"

"Iade gital chataigipasajok."

"Na'asan aganna man'ama mail" Timpa gisiktango ka'a nangaha. Ua an'tangko amna on na sikjaha.

"Iade mamungba ong'jasrang! Minio anga Africachi re angao angkode gorialan minoksrangahanesa."

.'Ah, na'ade tol'asa!" Tim ka'dingaha.

"Ong ja, Anga tol'jaenga."

"Indakode maisa na'a da'oba tangkuenga?"

"Ja'mano ua angko ku'galpilaha."

Iana Tim mamungkoba aganjaha. Ua Timpani golpona nambata gipin golpoko aganna chanchiengachim. Dikdiksa chanchiani ja'mano ua aganaha:

"Mejao, anga ramao roengachim. Samtangtangchin garirarasa."

"Anga uia, anga uia!" Timpa aganaha. "Da'o na'a an'tangko gari saljetaha ine tol'na sienga. Da'sion na.a iako tol'manaha."

"Anga ukode aganna miksongjaengaba."

"De indakode, tol'kubo."

"Anga ramako re'engachim. Rang'gitik gari bolsa angchipaknan tongtong salbaaha Angade ukode nijaengachim. Unon 'K-R-R-E-E-K' ine anga ga'chepmanaha. Una niora garide be'kningsrangaha."

"Ha-ha-ha! Apsan go'pol!"

"Oe, iade bebcen!"

"Maidake gari indita dal'ma-dal'pakon ga'chepna ama?"

"Ong ja, uade chongipasa, namen chongipasa. Uade ka'ani garisa. Bi sa saksasa budu kae sale roengachimro."

"Iade maimangmang." Timpa aganaha. "Angade mini changsao jajongonaba bildoangmanaha."

"Tol'srangal!" Timpa ka'dingaha.

"Na'a angko bebe ra jaenga? Anga re'angbebejok."

"Maidake uanona bildoangna ama?"

"Rocketo bildoangpajokai. Ong'jaode maidake bildoangna man pagen? Na'a da'onaba uikujaengama?"

"Indakode jajongo na'a maimairangko nikbeaha?"

Mamungkoba nikbajaha angade."

"Ha-ha-ha!" Tim ka'dingaha. "Uan jajongona bildoanggipama?"

"Oe bebean angade bildoangpajok."

"Indakode maidakesa mamungkoba nikbajajok?"

"Andalbeajokona. Angara walo jumangosa bildoanga. A'gilsak-ona bilonbapi'osa ang- mikrakaha."

"Oh," Tim aganaha. "Jumangosa jajongchi bil'anga ine na'a da'siniba aganj'jokona!"

Indakmiting tiktakon Iva uanona re'bae uamangni sepangon asongeha. Ua d.kd ks'na uamangni tol griktokengako knatimenba bon'k'mao aganaha :

"Indin tol'e rotokaia ! Na'songde tol'e ronaba kratcha tokjakon!"

"Maina krat cha'pagen? Sana krat cha'pagenna? Chingara pilsknaba tol jaenga," Timpa aganaha. "Chinga golpokosan aganenga,"

"Huh! Golpo!" Iva aganaha. "Odekrangni kelsa iade!"

"Golpo banaina altubea ine na a chanchia?"

"De, altubeaba," Iva aganaha.

"De indakode! Golpo mingsa banaibo na'aba.

"Angna somoi on'kubo, anga agangen." Iva aganaha.

Tim aro Timpa dikdiksana Ivani golpona sengo dongaha.

"Da mokune, secondsa sengkubo," Iva agantaiaha. "Uhhh.....

Mmmm Ummm....."

"Maisa, 'uh', 'mm' aro 'umm' inesa aganaia!"

"Minitsa sengkubo injok. Chanchina on'kubo."

"De indakode chanchibo."

"Uhh....." Iva agantaiaha. Unikoa ua salgichiko nigitoaha.

"Sengkubone! Ummmmmm"

"Altubea inebaro. Odekrangni kelsa inebaro."

"Sengkuboda! Ah, anga uiaha! Anga changsao achak mangsako kal'ake roengachim. Unon ua angko chikaha. Iara nibo, da'onaba agni ja'ao chikani pariko nikna man'engbiti."

"Indiba iara mai golpo ong'ahana!"

"Iade golpo ong'ja. Angna mai ong'aha ukosa na'simangna bebekon aganengasaba."

"Golpo banaina altubea ineba da'ode mingsakoba agannan man'jaenga!"

"Oe man'aia, indiba na'simang gitade angade tol'akode aganjaenga. Tol'eba mai namgni? Mejalo anga bilongen suk ong'bejok "

"Maina suk ong bejok"

"Mejalo ai aro babamang angko aro Tanyako noko donangenba a'palchi ong'katangaha. Tanyade babamangni re'bapilna sigitoo tujok indiba angade bini tusimitingo ghee botolsiniko adhako cha jok, indiba cha'nan sikkuegachim. Unigimin anga Tanyani ku'siko ghee nonge donjok. Ai aro babamang nokona re'baon ghee adhasan dongaiako nike angong sing'aha, 'Sawa ghee cha'ue cha'jok?' 'Tanya cha'aha' ine anga tol'jok. Tanyao na re'ange nioa bini ku'siko ghee nangmilengako nikenba aide bebe ra'e ka'a nangbejok. Da'sipringode ai Tanyako sasti on'jok, aro chingbaksa ronaba watat'jok, indiba angnade arobatai ghee on'taijok. Niboching, baditan suk!"

"Nang'ni a'sel Tanyako sasti on'jok' indiba na'ade suk ong'bejok!" Tim aganaha.

"Unikode maiko nangkua?"

"Mamungkoba nangjaha. Indiba na'ara da'oara mai ong'skajok? Asol tol'krok!"

"Na'a an'tangan tol'krok!"

"Katang! Ching baksa ronabe!"

"Robo inoba rojava anga. Anga na'songko namniks'rangja."

Bakan Iva chakate bi'saskarangona re'angaha. Tim aro Timpamangba bi'saskarangona re'baaha indiba jamdapo buchumana agre pilakkoba nikejaha, maina bi sarangko Ivaan songona ringopbatokaha. Re bamitingo Tim aro Timpa mande saksani adita appferangko patchio ra'e paljojobaengako nikaha. Uamang dongdike jeptangtangko knoktokaha.

"Ah, angong sa donga!"

"Angoba anachet donga! Hai an'ching apple rongsa breenba adha adha suale cha na!" Timpa aganaha.

Palgipaba uamangna apple.rongsa dal'akon baste on'ataha.

"Hai an'ching nokchi re'na," Tim aganaha. "Unosa an'ching churichi apsangrik ratongna man'gen."

"Hai nambebege !"

Uamang Tanyako ramao grongaha. Grapani gimin uni mikgron-rang gitchakpilengachim.

"Na'a maina grapenga ?" Tim sing'aha.

"Ai da alo angko salgimik nokningon chiptate donaha."

"Maina chiptate donjok ?"

"Ghee cha uani gimin. Angade cha'ujachim. Ivasa angko cha'ua potdraha. Haida bia an'tangsa cha'uahakon !"

"Oe, bian cha'ubebeaha. An'tang cha'uakon gaora dake chingna aganangaba biara. Hai ching baksa re baboda, chingo apple rongsa donga. Uko raton angri bak adhako cha na man'geiba."

"Angni bakkoba cha'na man'genba," Timpaba aganaha.

"Indakode ronggimikkon bia cha'kanna."

"Mai na'songa apple namnikjama ?"

"Ong ja, chinga namen namnika. Indiba da'sion chingade rongdok rong lok dake cha'aha." Tim tol'taaha.

"I dakoba hai an ching iako bakgittam ratenba cha'taina," Tanya aganaha

"Namaigen. Cha'taina sikipilengaha," Tim aganaha.

"Uasan ong'aija, ronggimikko cha'ode nang'ni wagamrang nosto ong'gen. Maina chi'gipa bosturang wagamna namjasrang," Tim tol'dapaha.

Unkoa uamang Timni nokchi re ange appleko bakgittam apsangrik rataha.

"Yummmmm ! Angade appleko namen namniksrange," Tim aganaha.

"Na'a uia, minio anga saksanan apple rong kolgrikko cha'na bon'aia."

"Tol'asa na'a !" Tanya ka'dingaha. "Pilakba nang'ko bebe ra'jawa."

"Ong'ja, angni cha'gipade iana pate chonchonbata. Kimka bite gitasan dal'aia. Uade bajalo bangalrangni palgipa apple lozensa."

"Oh, uasan !"



Picture 11. Tim aro Timpa aro uamangni golpo.



7. BONGAGIPA ROBIBAL

Kusi ong'bee bi'sarangni nichaksoenggipa sal - ROBIBAL SAL pil'satai da'alo sokbataiaha. Saljatchi so'olo, gilja matchoto bi'sarang re'baronga gita buchumako grongna re'baaha. Saan sakuenggenma, an'sengen rosoenggenma uamang rama jolgimikan buchumana jajrengbatokengachim. Indiba bi'sarangna namen kusini, buchuma saa namkalaha ! Raka kamrangko ka na amkujaoba biaptango asongge golpo aganna mangmangde amgnok ! Ua seng'gnarg anc-miksue jamdapni a'palo morao asongge on'ti-minti grina aro naponga an'tangni gansuri-chinsuri ba'rarangko kotap-ra'tapjoljele bi'sarargken nichak-sopaengachim.



Picture 12. 'Ua an'tangni ba'rarangko kotap-ra'tapengachim.'

Bi'sarang buchumani a'baona uni jamdapona sokon kusi ong'bee saksani ja'mano saksu buchumako ku'dintokaha. Anti gimikni salrangko maikai re'attokaha, dikdiksa agangrikani ja'mano buchuma aganaha, "Da'alde auga na'simangna mande pil'e skigipani kamko ka'gipa, 'SKIGIPA SKAL' ingipa golpoko agangen."

Ua bi'sarangni jatchio asonge an'tangni ba'rarangko sikjoljole agana a'bachengah :

"MANGSA SKAL dongachim. Changsao ua mandeni bimango saksu rajani a'songona re'bae ge'sa skulko kuliaha. Skigipa skal, segrirangni depanterangna agre je rokomni bisarangkoba an'tangni skulo rakkiachim. Da'o, saksu segri gnanachim. Ua an'tangni saksakamkam depanteko ua skulo poraiatna sikbeaha ; indiba ia skigipa skal uko ra'chakjachim. Uni gimin ua raj ni montri saksuona re'ange mol'molaha, 'Montri, gipinrang gita angaba an'tangni bi sako skulo done skie ra'atpana skachim, indiba ia bi sa segri me'chikni depante, pagri ong'ani gimin skigipa uko uni skulo ra'chakja. Ka sapae na'a an'tangko ia bi'sani pagipa inc aganenba ua skulo angni bi'sako poraiatra angko dakchakpana man'genma ?" Ka saning-gipa montri indaken dakna kusi ong'beaha. Da'o bi'sa skulo poraina man'paaha aro skigipa skal baksan dongpae, pilak lessonrangko skie ra'na a'bachengaha.

"Gisep gisep skigipa skal nokko wate gipin biapchina re'angrong-on, an'tangni kittaprangko aro gipin lekbarangko baksoni ning'o chipe kuturio donrongachim aro uarangko on'tisaba dang apjachina bisako raken beng'achim. Salsao skigipani n ko d ngjamungo, bi'sa an'tangni skaniko chakchika amjae, bakso donchakgipa kuturio nape sruk sruk baksoko oprake naha. Baksoni ning'o mande sko aro adita gipin gipin montol dakaniko skiani kittaprangko nike ua aiao inmanplaha. An'tangko dingtang dingtang bimangrangona pilaniko skie ra'ani bakrangkoba ua kittaprangoniko nie nikaha. Uni skigipa, mangsa dal begipa skalra agre gipin mandede ong ja inc ua masiaha. Bi sa an'tangni skigipani donggijamiting somoirango skalni montol dakaniko skiani kittaprangko poraina aro montolrangko mingna skie ra'na a'bachengaha. InJakoba iani gimin uni skigipa an'tangko on'tisaba chanch'chijana gita ua nam n gisik rakbeaha, simsakbeaha aro nangnikarangko poraimano biaptangon simsakbee donpilarngaha.

“Adita sarangni ja'mano, skigipa an'tangni skulo poraigipa bi-sarangko uni songona, an'tangni nokona rimangtokaha. Bi'sarang ma'tangtang-patangtangni, skigipana on atna man'paa chona aro dal'a boksirangko ra'e re angaha aro uamangni skigipa skalko ja'rikañg-tokaha. Altuaheen kusi ong bee bisarang an'tangko ja'riktokahani gimin skal an tangde kusi ong'beaha. Ua chanchiaha: Ia bi'sarang angna aro angni ma'drangrangna dal'begipa alaniko dakna hambe-gipa cha'anrang ong'gen. Adita re'ange uamang chibima dilsaona sokbaaha. 'An'ching ia dal'begipa chibimake ringgri maikai batna man'gen?' bi'sarang sing'aha. Skigipa skal aganchakaha, 'Jajrengnabe anga j.koba dakgen. Na.simang pilakan mikchiptokbo aro na'sim-angoni saoba saks aro rim bo, sakgipin uko rim'skabo aro indaken saksara sakgipinko tim'grikgrike riting dake jakritungbo. Angko ja'rikbo aro angni agankujana kingking mikgronrangko onabe 'Ski-



Picture 13. Bak'oni ning'o ua mande sko aro gipin montol daka-niko skiani kittaprangko nikaha

gipa uamangni skang skang re'angaha. Segrini bi'saan uo rim'aha aro sakgipinrang skigipani agana gitan saksani ja'mano saksa, saksani ja'mano saksa dake rim'griktoke ja'rikangtokaha.

"Bi'sarang pilakan an'tangtangni mikgronrangko mikchiptokaha, indiba segrini depantede mikchipoba on tisade mikkesichi an'tangni skigipani daka pilakkon nirikkiengachim. Skigipa skal an'tangni dokraoniko wa'tok ge'gniko, bikote, chibimako tipatna montol minge, wa'tok ge'sachi opaha aro pilakan batmentokahaoa chibimako gapa:piltaina ge'gipin wa'tokchi, spotaiaha. Unikoa ua bi'sarangko mikgronrangko ochina aganaha. Adita chel'e re'angtaiani ja'manon uamang dilgipin chibimako man'etaiaha. Ia changoba uamang ia chibimako apsan bewelon batsotaha, indiba ianpako bi'sarangko mikgrontangtangko ona aganna skangan wa'tokrangko bakan chibimani rikamo an'chenggo gope donnuha. Segrini depantede ia pilakkon nie dongaha.

"An'tangni nokona sepangbahaon skigipa skal aganaha, 'Bi'sarang, na'simang pilakan ianon sengkubo. Noko dakna nanga'alito k:mrangko anga re'ange dakchengkuna. D'kdiksi ja'manon anga re bapilgen' Ua bi'sarangko ua biapo done an tangde songchi mikkange re'angaha. Uni ja'mano bi'sarangde uko sengsobeaha. Skigipa skal re'ange, an tangni ripeng skalskarangna uamangna nambe-gipa cha'anirangni sokbaani kobolko on'caha. Mikgronrang cham-pile, ru'utbea somoirangna skigipako nichaksoe bi'sarang neng'tok-beaha. Maiba namgijani uan angna ong na sienga ine, segrini depante ripengskarangna aganaha, 'Ripengrang, na'simang ianon sei gsakubo Anga daariange skigipa maiko dakenga niwatutgen.'

"Ua ta'rekbee daariange, skigipa skalni nokona sokange skigipa skalni e'sal, am bol, wa'al aro me'dik-sam'dikrangko chim ngengakosa nikeaha. Pakmao sitee dongipa ge'gni mande skorangkoba ua nikaha Pakmao sitee dongipa ge'gni mande skorangkoba ua nikaha Ia skoreng bukan bisana aganaha, 'Na'simang maina ia biapona re-batokaha? Skalrang a simangko cha'na am'enga ine na simang ujama? Na simang bakbak ia biaponi katangtokbo' Ia skorangoniko knae bakan ripengskarangona katbapile uni nika pilakkon aro ge'gi skorangni una

agana kattarangko aganetokaha. Ia kattarangko knaon bi'sarang kennan til'til tokaha, indiba segrini depante uamangna agnaha, 'Kenna-be. Hai an'ching ia biaponi bakbak katpilna. 'Uamang uamangni re'baa rama gitan re'pilbatokaha. Uamang chibimaona sokahaon, skigipa skal aro gipin skalrangni, uamangni ja'man rikbaengako nik-ataha. Indakoba segrini depante, donnugimin wa'tok ge'gniko an'-chongoniko bikote, ge'sachi chiko ope chibimako tipataha aro pilakan batmanoa ge'gipin wa'tokchi sposkae chibimako dramona suakpilate chiko gapatpilitaiaha. Skalba chibimani rikamona sokbae, maika bi'sarang jokangtokaha, nika, mamungkoba dakna man'jae, ka'o nangbee chrikataha, 'Na'simang angko togiaha. Atcha re'angtokbo, anga na'simangko rikangskaenga.'

"Atchurang, aborang, golpo bon'ade ong'kujachim, indiba da'o sal napua. Sie ga'ra Golpo ro'engkua indiba somai da'o namen kan'dik-beaha Uasan ong'sija, anga an'tangba namedake be'en an'sengade ong'kujaengani gimn ru'ute asongna amja. Da'alnade ianon dontong-ainajok. Angko neng'takna on'bojok. Name an'sengahode ia golponi tong'sako mikkang Robibal salo anga agantaigen. Da'alo gita na'simang ap'an semoion re bataibo. Mikkang Robibal salo grong-taina man'na gita tom'tome rakkiangkuchina na simang an'tang-tangna aro angraba Isolo bi'bene."

Indaken bi'sarang buchumako wate noktangtangona re'bapiltokaha.



8. DOKGIPA ROBIBAL

Buchumani manchigipa sal da'alo sokbaaha aro bi'sarangba kusi ong'bee buchumani a'dapona re'batokaha.

"Ambi, da'alde nang'ko an'sengbee nika!"

"Oe, anga meja mongolbal mongolbal salonin an'sengbataha."

"Na'a an'sengehongmotgen ine chinga bebe ra'a, maina meja robibal salo songona sokearion chinga nang'ni bilgrianini gimin atohu pamongna agane on'eaha. Knaarian ua attamni giljao nang'na bi-chakaniko dakataha aro chingaba pilakan nang'na bi'tokaha. Isol nang'na ka'sae nang'ni saanirangko namataha!"

"Isol an'ching pilaknan ka'saa. Uni ka'saani salakkmio dongenga dipet an'ching pangnan duko ga'akjava. Uni gimin hai an'ching da'oba ken'dikbee Isolko mitelna: anti gimiko an'chingko tom'tome rakkianina ong ja, indiba mikkangchi maikai an'ching duk-sukar salrangoba Uni ka'saan grangni ning'o dongkamna man'gen"

"Salgini Apa, chinga Nang'ko mitela, maina na'a chingna inditan ka'saaha. Nang'osa chinga ka'donga, Nang'osan chinga bebe ra'a: aro Nang'osan chinga pangnan katchaa, Nang'o bebera'gipa sakanti katchaa, aro Nang'o katchagipa sakanti tom'tomaniko man'a. Nang'o katchana aro pilak salrangon Nang'ni ka'saan' grangni ning o dongkamna chingna cholko on'angkuchina bi'aha, Amen."

"Da'alo anga re'anggipa Robibal salo agangipa golponi tong-sako agangen."

Unikoa ua a'bachengaha :

"NAMGIJANA MANGSONGESA skigipa skal uamangko rim-baaha ine uimanahaon bi'sarang namen kenbeaha aro an'tangtang-ni gong'raka gita songtanganon katbapiltokaha. Noktang-songtang-ona sokbapilon, segrini depante uamngna ong'a pilakkon ma'gipana aganetokaha. Skigipa skalni noko dongpae, skalni montolrangko skie ra'mane aro uimane, ua ma'gipana aganaha, 'Ama, anga do-bok pil'gen. Na'a knalo angko palna antiona ra'bo, indiba mam-ungsaloba bregipa mandena angko kagipa buduko on'atnabe. Na'a

nokona sokna skangan anga nang'ko, ja'rike srapegen. 'Pringipino
 ua do'bok pil'aha, aro ma'gipa uko palna antiona mobaaha. Ua-
 mangni skigipe skalan mandeni bimango re'bae ua do'bokko breaha.
 Indiba dikdiksanon ua bisa noktanganon re'bapila. Pringipino
 uni ma'gipa uko do'gepni bimango, antiona palna ra'angtaiaha. Ua
 do'gepkoba apsan skalan breangtaiaha, indiba chipchakgipa kachako
 on'atjaha, Skango gitan bisa mung a'sel grian noktangona sok-
 bapilaiaha.

'Ia changoba bi'sa jokangtaiaha ine nike skal ka'o nangbeaha.
 Changgipinode anga uko jokatchorg motjawaha ine ka'a nangbee
 wagam chikmujile, je bimango re'bataoba, je damoba ua bi'sako
 breaina ua antiona re'bataiaha. Salgipino segri me'ch k bi'satanko
 gadani bimango palna antiona re'bataiaha. Ia chango skal je damo
 pala ugitan ua gadako breaha indiba ia changode kagipa buduko
 watgilangjana namen gisiko nangbeaha. Jegita on'atna jechakoba
 aro sikjaoba, ua draen gadako kagipa buduko ra'angdraiaha.



Picture 14 Buchuma je damo pala ugitan skalba gadako breangaha.

“Skal ia gadako chibimani rikamona ra'ange uanon cha'na chanchiaha. Indiba gada maibakaiba skalni rim'aoni jokange guk pil'skae samsirangni ning'o nape kataha. Unon skalba bakan gukko cha'na gita do'o pil'skae rikongaha. Guk bakan beng'blok pil'skae chio nape kataha. Skalba bakan beng'blokko cha'na ki'sing pil'skae rikangaha. Ki sing uko srapna dakmangmangon segrini depante mik-japsanon gorial pil'skaaha. Gorialko cha'na skal gipin bimangona pil'na da'o chol dongjaha, maina gorialko cha'na amgipa gipin bilakbatgipa chini jontu dongjahachim. Ki'sing gorialoni jokna ama dipet jroe kataha, indakoba dikdiksani ja manon gorial uko srape uni matsramgipa wagamrangchi chikropaha. Skal an'tangni chong'-motgipa bimangona pil'e chrikwelwelo siaha aro dal'gipa chibima uni manggisiko uisokgijagipa aro niksokgijagipa biapona balpak-angaha.

“Bi'sa noktangona re.bapile an'tangni ma'gipa baksa kusi ong'e janggi tangangaha.”

“Golpo ianon bon'aha.”

Buchumani golpoko knamano bi'sarang noktangtangona re'bapilitokaha.

9. SNIGIPA ROBIBAL

Kristanrangna Robibal sal dal gipa sal ong'achim. Ian neng'-takahi' sal' ong'achim. Mongsongbate ia sal bi'sarangna dal baachim, maina gipin gipin salrango bi'sarang skulchi re'na nangkamaia aro gi'epo chuti man'paoba skigiparangni on'ata Home-workrangko dakna nangachim. Basakoba basakobade bi'sarang salgimikgimikan poraina aro Home-workrangko dakna nangrongachim. Ronade on'tisamangba somoikon man pilrongachim. Aro basakon Robibal sal sokgen ukosan uamang nichaksoaiachim, maina robibal salo uamang aua-miksuana agre gipin dakna nanga kamrang dongja-chu'gimik jakgitel ong'achim. Unbaksana bi'sarang Robibal salantian nangipa aro su'ugipa golporangko buchumaoniko knana ka'dongsotokengachim.

Da'o bi'sarangni nichaksogipa Robibal sal sokjok! Bi'sarang pilakan re'baronga somoi tiktakon buchumani a daponu sokbaaha. Niksoarian buchumaba bi'sarangko rimchaksoaha. Dikdiksa asonge golpoani ja'mano buchuma GONGANI DEPANTE ingipa golpoko aganna a'bachengaha:



Picture 15. Niksoarian buchuma bi'sarangko kusj ong'bee rimchaksoaha

"GONGA MINGGIPA kangalbegipa gane cha'gipa saksu mande dongachim. Uo sak-gittam depanterang dongachim. Uamangoni sakgni depanterang namen namgipa bi'sarang ong'achim, indiba sakgipin gittamgipa depante Banjang minggipade namen dengugipa bi'sa ong'achim. Ua makkre gita namen siksakbea aro pilak kam-rangon dengugipa ong'achim. Pangnan ua skuloni sruksruk ong-kate katrongachim. Skulni skigipa ua bi'sani pagipa Gongana, uni denggu ong'aniko agane on'aha, 'Nang'ni depante Banjang pangnan skulona re'ba'ongiaenga.' Gongu aganchakaha, 'Ma'isa pangnan tik somoio nokoni ong'katangronge, skul matchotani tik somoion re-bapilrongengade.' 'Ong'ja, ua re'bachongmotja, pangnan ua a'palosa namgijagipa bi'sarangmung kal'grike rorongenga. 'skigipa agana.

"Gongu antangni depanteni namgijani gimin knaon namen duk ong'beaha. Ua Banjangko dokaha aro ka'o nangbee jikgipana agana, 'Da'al dipet upa mi on'nabeaha. Mini pal taprako on'skabo.' Indiba da'nang! namjaoba ua bi'sani ma'gipa, antangtang oko gape cha'engo depante saksako maikai cha'ani gri okumu dongen! Kangal ong'oba, cha'atok-ringatok dake mangmangde cha'paenga! Indakoba ua segipani ge'etako galna amjac, Banjangni mipalo, basonni rikingo on'tisa taprako done depantena on'aha.

"Banjang antangni mipalo taprako nika maina donaha ine ma'gipao sing'aha. Maikai Banjang pagipako duk ong'atbeaha aro maina mini pal taprakosan una on'china agana, ma'gipa una agane on'aha. Iako knaon Banjang gisiko saknabeaha aro adatang-rang, ma'a-paa aro nok-jamna ka'pakteoba, gisiktango pi'akkon salam ka'e, mikchi ong'e jcingjretna wate re'angaha.

"Uchi-ichi re'bingbange, bon'kamao ua chongipa gitim damsana sokbaaha. Ian ring choe, na tok rim'e cha'gipa kangalbegipa dolni songdongram gitimsan ong'achim. Songdonggipa manderang uo sing'aha, 'Na'a sawa? Nang'ko badiaba dal'gipa nokdangni mande gita nika. Ia kangalbegipa dolni songdongram gal'chipgimin gitimona na'a maina re'baaha?"

"Banjang aganchakaha, 'Angna ma'iba cha'aniko on'pabo; anga okkie sina siengaha.'

"Banjang man'e cha'gipa nokdangoni ong'pajaoba, ia na tok

rim'gipa kangalgipa manderangna mangmangde chubatkala gadangni mande ong'paachim. Uni gimin an'tangtangni song'a-ritakode cha'o cha'napjawa, ringo ringnapjawa ine chanchie uamang una adita rongchu aro mitairangkosa on'aha. Ua uarangko cha'e okkae, adita somo'rangna uamang baksa agangrikaha aro uamang baksan dong-pana namnikaha. Manderangni rike on'a nokon ua donge songdonggipa manderangni bewal gita kamrangko ka'pae uanon janggi tangrimpaaha. Ripengrang gita uaba na'tokrangko rim'paaha, am'bolrangko pite pale cha'paaha. Ua gitimonikon ua me'chik saksako bia ka'aha.

"Basakoba basakoba uni jikgipako, uni ripeng me'chikmaskarang indake aganrongaha: An'chingie na tok rim'e, am'bol den'e cha'gipa kangalrangsa ong'a, nama nama ba'rarangko, gamchatgipa ripok, jaksan, jakstem aro uandakgiparangko ganpana chol ong'paja; indiba nang'ni segipade ching'gita mangmangde ong'paja. Uade man'e cha'gipa nokdangonisa ong'a. Mninasa na'ara uarangko nang ni segipao bi'e ganpajaenga ?

"Me'chikmaskarangni kupatia gitan ua ia dam rakbegipa bosturangko segipao bi'aha. An'tangni cholgriako agane, uni bi'a gamchatgipa aro dam rakbegipa bosturangko brena jechakon, segipako an'tangni choligijakon mesokana, ua manenge chonnike aganatra, 'Indakode anga nang'ko wate sakgipin me'asakon bia ka'wanganon nambatsranggen.' Ua duk ong'bee aganaha, 'Ka'sapae, adita salrangna sengpakubo, gimikko man'pajacha uaragoni beng'aken anga nang'na man'e on'gen.' Unikoa ua nokko-jamko aro jakko wate ong'kate re'angaha.

"Adita re'angani ja'mano sal napaha. Ua ramisamo, dal'begipa bol pangsan ja'pango waltuna neng'tekna. Ua bolo mangsa do'o dongachim. Ua bolo donge do'oni dakni kamara, salgioni a'gona kobolko ra'ruraanian ong'achim. Do'o an'tangni bi'sarangna cha'anirangko on'engachim. Do'o aganaha, 'An'chingai dongchakgipa holni ja'pango mande saksa donga. Una on'chenggijade an'ching mamungsaloba cha'anirangko cha'na man jawa. 'Do'o chibimasona re'ange adita na'tokrangko rim'e ra'baenba uamangona sakgipa mande-na on'aha. Banjang do'o sing'aha, 'Anga baenba wa'al man'gen? Wa'al man'gen? Wa'al gri anga na'tokrangko cha'na man-jawa. 'Do'o aganaha, 'Re'ang dotgailo ra'e nake totgrikenba wa'sare ong'katako rabo'



Picture 16. 'Ro'ong dotgniko totgrikenba wal'sare ong katako ra'bo.'

"Banjang do'oni agana gita dakenba bikote na'tokrangko so'e cha'aha aro ua walo uanon tusiaha. Walgimik do'o Banjangko nitimaha. Do'o namen ka sachakbegipa ong'achim. Pringpipino do'o Banjangko an'tangni ripeng skal rajaona chiti kingsako see uni jakon on'ataha. Ua chitini katta indake ong'achim: 'Ia pante namen kangalbegipa mande ong'a. Kragipa aro nam'amgipa sonani gandingrangko man'e on'pajani gimin uni jkgipa uko gale katna am'enga. Ka'sapae je cholchiba na'a uko dakchakatpabo.'

"Seata chitiko ra'e Banjang skal rajaona re'baaha. Cholgugako dongtimgipa Banjangko rajani nokni ning'chi napna aro rajako grongna on'jaha; indiba rajana watatgipa kobolko an'tangan ra'bae a'pato dikdiksana sengchina aganaha. Kobolko man'soarian raja kobolko ra'bagipa panteko nokningona rimbaate ripengtangni uiafa gita naffen simsakaha: 'Auna, rongtalgipa ba'rarangko ganna on'e, cha'ani-ringanirangko namen tarie on'aha. Raja namen mane cha'beachim aro pilak jakkalanirangkon changprak jakkalarian galat-tokaiachim, Iako nike Banjang galgimin sonani jakkalanirangko

kolamna dakon, raja aganaha, 'Ia galgimin. bosturangko kolame an'tangko neng'atnabe. Iarangna nambatsranggiparangkon na'a ripena ama kakket ra'angna man'gen.'

"Adita salrangni ja'mano skal raja Banjangna bang'bea sona aro ruparangko on'e watataha. Je bolni ja'pango ua skango waltuahachim, da'oba ua bolni ja'pangon waltuna neng'taktaiaha. Bi'sarang uamangni sokgipana cha'na on'na draahaon, ma'gipa do'o chiringona bilange adita na'tokrangko rim'e ra baaha. Cha'man' ringmano, do'o Banjang aro uni gamrangko bolona ra'doe an'tang bak'san walsengatna aganaha. Banjang da'o bakan tusingaha. Do'orang tusingahaon Banjang simsaksaaha. Ua chanchiaha: Da'alde anga na'tok so'ako cha'aha, knalo anga ianoni re'chakatna sion mako cha'skagen? Anga ia do'okon cha'sranggen. Indake chanchie ua an'tangna ka'sachakbee dakchakgipa do'okon so'ote an'tangni gamrang baksa kachap: donaha.

"Da'o mitderangni a'songoni adita kobol ra'ruragiparang do'oni kamrangni gimin nirokna aro sandina re'baaha aro do'oni donggijakosa nikeaha. Banjangni namgijagipa kamko nike uamang ka'a nangbeaha Uamang do'oni janggiko ra'apile tangatpilaha aro aganaha, 'Ia denggugipa namgijagipa mandena uni namgijagipa kamna mai sastiko on'na namnlggen na'a aganbo.'



Picture 17. 'Galgimin bosturangko kolame an'tangko neng'atnabe.'

'Do'o aganaha, 'Is mandeko ro'ote an'ching mai namgniko man'gen? Ua tangea dongchina. Hai an'ching uko an'chingni nokkol dake ianon rakkina.'

"Rasong grigipa, namgijagipa aro mikbokgipa Banjang noktangona an'tangni ka'sagipa jikgipaona re'angpilna man'jaha. Janggi tanga gimiko ua do'ona ding'ol gramchie kamko ka'na aro una dangdike on'na nangaha."

"Da'alni golpo ianon bon'aha."

"Banjang uni mikbokachin an'tangni nokona re'gni ramako den'sotaha. Uni mikbokanian uko nokkol ong'ataha. Uni gimin na'simangba pangna gisik ra'bo, je, MIKBOKANIARA GIMAANISAN ONG'A."



10. CHETGIPA ROBIBAL

Da'al robibal sal ong'a. Sako aram-gurigri engang engang a'a biba chadopile sal raka aro namen ding'achim. Gitimoni buchumani donggipa a'baona, chini rikamona komibeoba furlong 7 mangde chel'achim. Indiba bi'sarang buchumani golporangna okkrie sal ding'ako ding'a minggija gilja matchoto buchumani a'dapona re'batokeha. A'dapona sokeon buchumaba ding beani gimin chibimao ansoengachim. Buchumani aumankujana kingking bi'sarang chibimani r kamo, bolni salakimrango kal'grike roaha. Uamang bol japangrango asonge aro tugitile roaha; maina chibimani rikamo bol bang'a aro baiwa balsiri balachim.

Buchuma aumane ba'ra-kancharangko su'e an'tangni jamdapona re'baaha. To nonge kni ken'mano buchuma bi'sarangko jamdapoba ding'bea inenba chibimani rikamo salakimon asongdile BONGA minggipa na'tok rim'e cha'gipa kangal mande saksani gimin golpoko agana a'bachengaha:

"BADIABA GITIM lamsao Bonga minggipa kangalbegipa na'tok rim'e cha'gipa minde saksan dong'achim. Salantian ua chongipa ringo chek galna, na tok rim'na chibimaona re'angrongachim. Iachia ua aro uni jikgipa janggi tangachim.

"Salsao Bonga re'rongi gita dil'gipa chekko ra'e chibimaona na'tok rim'na re'angaha. Salgimik ui chekko galoba mangsa na'tokkota man jaen'achim. Salgimik salni ding'ako chake chek galoba mangsekoba man jahaon ua duk ong'bee chanchiaha, 'Anga na'tok mangsakoba man'jaode da'alde maikon cha'gnok. Anga aro angni jik da'alde okumi chakna nangaignok!' Ua duk ong'bee sintie rake ajanaha, 'O Rasongni mitde, na'a angna kangal mandona ka'sachakpabo. Okkrie sengoenggipa angni jikgipako kusi ong'atna aro ia salo ch'ngni cha'animamangmang na'a angna maikobade pattipabo. 'Ia kattarangko agane Bonga bon'kame an'tangni chekko chibimani tu'gipa wariona galataha. Saldopilon cheko maiba nangaha ine ua uiaha maina chek da'o namen jrimbeachim. Kusi ong'bee Bonga an tangni chekko saldoon nikronggija nikaniko ua nikaha. Uni cheko na'tokni pal buchuma saksakosa man'baahachim. Indakgipa a'sello ua changsaba chagrongkujani gimin ua aiao inmanbeaha aro

an'tangkon jumang nikenga inesa chanchimanpilaha. Ua bukan chekko chionan galatpilna dakengachim, unon buchuma Bongana aganaha, 'Angde, angko galonatpilnabe. Angko a'gaona ra'dobo. 'Bonga buchumako a'gaona ra'doe, duk ong'e jakari noktangona jripjrip re baaiaha. Buchumaba Bongakon uni nokona ja'rikbaaha

"Na'a maina angko ja'rika?" Bonga ka'o nangbee buchumako manenge aganaha, Salgimiko ding'a chakoba mangsa na'tokkoba man'pajahani gimin ua duk ong'beenga aro ka'a nangbeengachim.

"Anga nang'na kam ka'g:n. Angna tusiani biap aro cha'aniko-mangmang on'aibo,' buchuma mol'mole aganaha.

"Bonga ruti gitcham dotsako ra baenba buchumana cha'china on'aha. Buchuma ukon kusi ong'bee suk ong'e cha'aha, indiba Bonga aro uni jikgipade ua walo okumu tusina nangaiahachim.

"Waljatchio ua maibani gam'ako knae mikrakaha. Ua kelki oe a'palchi niwaton buchumani kam ka beengakosa nikaha. Ua buchuma Bongani bario ge'gip:n nokko rikengachim.

"Na'a maiko dakenga?" Bonga sing aha.

"Nang'ni namgninan anga nang na nangchongmotgipakon dakenga. Buchuma haida pagli ong'engakon ine chanchie mamungkoba sing'dapgija aro agangija jripjrip tus'na ua biaptangonan re'angpilalaha.

"Pringgipino chakaton Bonga Buchumani an'tangna matchu nol gesako rike donako nikbebeaha. Indakoba ua nol una mamung namgnikon ua nikjaha maina uo matchu mangsaan dongpajachim. Dikdiksani ja'manon, Bongani mikkangjakjakon bang'bea matchu bima aro biparang Bongani nokchipaknan re'bae buchumani rikgipa nolon napetokaha. Ua matchurangko chibimaoni re'baa gita nikachim, naina uarang chibimachinipakonin re'batokachim. Bonga ku'agana hangpilgija aiao inmanbee nitate dongaha. Indakmitingon buchuma Bongana aganaha, 'Iarang pilakan nang'nin, angde.'

"Agansokpilgija Bonga kusi ong'beaha. Ua sal intal Bonga kangal ong'chajaha. Ua matchurangni dut, butter aro gheerangko pale bang'bea tangkarangko man'e salsani ja'mano salsa man'e cha'atrorobaaha. Salantian Bongani pala bosturangko brena re'bagipaan

Bongani nok aro sa'raon biapan chakpiljachim. An'tangni ku'chaka gitan Bongani dakna nanga pilak kamrangkon buchuma an tangan saksan dakachim. Bongade pale man'a tangkarangko ra'sona aro uarangko chimonge donnasan nangaichim.

"Bonga an'tangni am'pangni nokko rugale ge'gipa nitogipa nokko rikskaaha. Badita gamrangko Bonga man'daproroaha, inditan ua gaora de'na aro namgijagipa kamrangko dakna a bachengroq-baaha. Ru'utgija salrangni gisepon ua namgijagipa ripengrangko man'aha. Salantian ong'na sipile ua an'tangni ripengrangko cha'na okamrongaha aro an'tangba uamangni nokrangchi re'angrongaha,

"Walsao Bonga an'tangni ripengni nokoni waltinbeasosa noktangona re'bapilengachim. Ua dugapile chuko ringahani gimin tik ong'en ramatangko re'na man'jaengachim. Noktangona soke ua do'ga doktikon maiba a'selni gimin buchuma una do'ga oningna man'jaha. Do'ga oninggijako nikon Bonga buchumako namen ka'o nangbee chrike aganaha, 'Anga nang'ko chioniko ra'doaha aro nang'ni cholgriako nike ka'sachake nang'na dongnaba biapko on'ahachim. Indiba da'o na'a angko mandean mingjaenga? Na'a bakbak angni nokoni ong'katangbo. Nang'na agreba ango bang'a chakkolrang ngang, uamangan angna kam ka'gen aro dangdike on'gen!"



Picture 18. 'Buchuma aro matchurang jekai re'bas indaken tu'begipa chibimaonan re'angpiltokaha.'

"Buchuma mamungkoba aganchakgija jripjrip chibimachinan mikkange re'angaha. Aro nibol! Bongani nie dongengmitingon uni rikgimin gital nok aro matchu nol an'tangtangarian a'dimu changpile be'gruaha. Unbaksana matchurang pilakan buchumako chionan ja'rikangtokaha. Ia pilakko nike Bonga chrike a'boke buchumako okamrikaha, indiba changsa janggilatahaon ua on'tisaba nipiltajaha. Dikdiksani ja'manon buchuma aro uko ja'rikbagipa matchurang jekai re'baaha uandaken tu'begipa chibi:maonan re'angpiltokaha.

"Pil'satai Bonga skango gitan kangalgipa mande ong'taiaha. Ua duk ong'bee be'grugimin an'tangni noksurini jatchio asonge sintiaha, 'Beben ia buchumara Rasongni Mitde ong'achim!'

"Golpo ianon bon'aha."

"Gamtango gaora de'gipa an'tango je donga ukoba gimaatranga. Uni gimin gamtangna gaora de'na nangja, maina Pattigipa-ra rongipaan pattijaode mande mamungsaloba gamni nokgipa ong'na amja."

Uniko bi'sarang dikdiksa asongari noktangtangona re'bapiltokaha.

—

11. SKUGIPA ROBIBAL

Robibal changanti namnamgipa aro su'ugipa golprangko agane bi'sarangko muni nangatgipa buchuma ia SKUGIPA ROBIBAL salo bilsa 70 ong'aha. Mande jongjongko nikjaoba ia bilsa 70 ong'gipa buchuma baditana rakkuenggen ba badita buchuma ong'enggnok chanchichipatna man'a. Buchuma ong'oba ua gipin buchumarang gita noko asongtate on'akosan cha'aigipa buchuma ong'ja, an'tangan an tangna song'a-rita aro on'timinti saakode saa minggijaan amenga dipetnade je kamrangkoba ka'rongachim. Uni gimin bilsina krapilgija ua namen bilgriahachim. Ua ja'skuo rim'chanesa malamajok, kang'kareko rim jangesa chadengaijok! Bang'bata salrangon ua bi'sarangna golporangko aganahaoba bi'sarangni watja-donja dakrongahani giminsa aganrongahachim. Pilsaba, jeje golporangko ua uni pagipaoniko knaaha, an'tangni tangmitingon bi'sarangna agane donangjaobe indaken gimaangaignok ine chanchiesa bi'sarangna kusi ong'bee aganrongahachim, maina an'tangni knagimin golporangko see dorangna gi'a ua sena-jotnata inditanade cholipajachim. Uni gimin ia skugipa robibal salo aue-miksue tari-tilongmano buchuma BONGGI TARO UNI SILGRAKNI CUP ingipa golpoko bi'sarangna agana a bachengaha:

“RU UTFEA BILSIRANG re'angaha, chonbegipa gitim damsao pagri-ma'gri adasa dongachim. Uamang uamangni ambitang-atcutang baksa dongachim. Salsao, a'ba o'engmitingø, uamang do mesal bitchi rongsako man'aha. Uamang uko wa'toko brengenba cha'aha.

“Aba o'e, attam-salniangon uamang nokona re bapilaha. Uamang nokona soke ganti gr'adpangmangengon, ambitang sing'aha, 'Na'-simang maiko cha'baaha?' Uamang adasa aganchakaha, 'Chinga do'mesal bitchi rongsako man'enba wa'toko brengø cha'aha.' Kalsuet-miksuet, j.k chibipilari salgimik a'ba o'e neng'o, do'o bitchi rongsamangman'ko rite cha'ani bebegipa kattako uamangoniko knaon, buchuma gisiko sabeaha. Ua an'pile 'budepana aganaha, 'Panghaan, je cha'anikoba an'ching ia bi'sarang baksa je on tiprak tika, 'sualatie cha'rongachim, indiba uamang do'o bitchi rongsako man'e chingko gualø, an'tangtangari cha'aiaha. Hai, da'ode an'chingba jekoba an'tangtangari cha'e katinaha.'

“Salgipino, adasani a'ba o'na re'angtaion, buchuma-budepaba wakkasi mangsa jilpaakon den'e, an'tangtangmangarian cha'prete uamangni nokko-jamko wate katangaha. A'ba o'e, neng'skime attam walsimsimo nokona re'bapilon ma gri-pagri adasa uamangni abotang-atcutangko noko nikejae am'roroangaha. Buchuma budepako am'roroe da'o diltubegipa burung bolgrimona sokbaaha.

“Burung-bolgrimni jatchio dal'begipa bol pangsa dongachim. Nike mikbokna gita ua bolni cheksiantion, gongnok gongnok nito-begipa, cha'na tobesusu dakgipa smilbegipa biterang, dingdee dongengachim. Adatang aganaha, 'Biterang mintokaha, okkriara okkribeaha, hai an'ching ake cha'na.' Uamang dingone dongenggipa biterangoniko rongsako cha'mangmangarian adatang bakan do'o pil'e bile katangaha. Jonggipade saksan indita diltubegipa burung jatchio, duk ong bee grape dongaiaha. Uni bimung Bonggit ong'achim. Ua pilakchiba re na apnikjae, sepango donggipa gitding bolmani ja'pango, dal'dalbegipa ja'dilrangni gisepo, bolkugepni ning'o, bolbite-wa'biterangko cha'e dongaiaha.

“Uni sepango segri buchumani a'ba dongachim. Uo dedrang-su'drang dongpajachim. Ua buchuma noktangkon gale, jamtangkon done, a'baon dongkamachim. Bonggit salantian ua a'baoniko biterangko cha'ue cha'rongaha. Salsao buchuma uni a'baoniko, Bonggitni te'e cha'ue cha'ako nikdike sing aha, 'Na'ara sawa?' Bonggit kenbee aganchakaha, 'Ambi, anga saksu branggipa bi'sa ong'a. Angni abotang-atcutangko am'roroe, brangroroe anga ianona sokbauha. Da'o salgittam salbri ong'pilaha, ange mamung cha'anikoba man'gija, okumu chake dongaha.'

“Buchuma ia bi'sako nike ka'sachakhee an'tangni nokona rimange, an'tangni de gita dongchina aganaha.

“Buchumani noko donge adita bilsirang re'angahaon, Bonggit badiaba gitimoniko me'chik saksako rimbae jik kimaha. Bonggitni jikkim-jikdongani ru'utgija bilsirangni ja'manon buchumaba saha. Buchumani ja'mano uamang bilongen duko ga'akaha: Uamang cha'anibeaha; salrikkitan okumu chakna nangaha aro pitakchiba chol man'jae uamangni be'en bikaprangmangmangba ong'sibeaha. Cha'ani-ringani donggijachi uamangko bilgriatbeahaoba aro ram'sisi-ram-dengdengatbeahaoba Bonggit iana ka'a be'jaha, duk man'jaha indiba jensalo ua jikgipani guasu ripit-ripet napile, greng-biking basana man'pile grengrok kam ka'eba oko rongsa-ku'sa napgija, okumu

chakna nangan, uni ka'tongo duk ong'ani aro ka'a gapani wa'al gita ching'chaaha.

"Salsao ua duk aro ka'agapani ka'tongan gape nokoni ong'kate re'angaha. Balponggiapa aram gita, miksonga biap gri nipil-nichag'ja ta'rakbee re'e dikdiksanon ua uni dongenggipa gitimni nalsao ong'aha aro gitimni salgrochipakni diltubegipa burung bolgrimo napaha. Ua dal'begipa bolni ja'pango asonge denggoke dongaha aro jikgipani bimangko gisiktango jrangjrang nikatahaon, ua duk ong'bee chrikaha, 'O Isol, na'a maina angko inditan kangalatbeaha ! Jikgipa saksamangmangnaba chanchisa miko okkandi on'namangba cholgriate cha'asiatbeaha ! Baditana kingking anga uni dukko nikangkuna nanggen ? Salantian ua nang'o bi rongaha ; aro mamung saloba ua uni rakbegipa janggi tanganina nang ko matnangjaha. Na'a on'tisamangba ka'sachakjawama aro uni dukko chel'atjawama ?"

"Rang'gitik ua burung bolgrimo, maibani ja'birangko knaaha. Ua chakate, maiamanchako knaenga, ja'chile samtangtangchiko niwilwalaha. Unon ua saksa budepani an'tangni asongenggipa biapchinan mikkange re'baengako nikataha. Ua jola kingsako keachim. Bonggit ia budepako nikaton asongpile choknoke dongaha. Dikdiksani ja'manon budepa Bonggitni asonggipa biapona sokbeaha aro dongdike Bonggito sing'aha, 'Angde, na'a maina inditan dukko man'a ?"

"Nang'na agane mamung namgni dongja, maina ia a'gilsako pilakba angni dukko chel'atna dakchakna man'gipaan dongja."

"Man'janaba donga, indiba dukni a'selko agananimangmangde nang'na mamung gimaani dongjawa'."

"Anga saksa kangalbegipa mande ong'a,' Bonggit aganaha, 'namen kangalbegipa ong'a-angasan ong'ja, angni jikgipaba. Salni gisepo mirim rongsakoba chinga man'e cha'paja. Pangnan chinga okumusa salkon-jakon re'atna nangaia. Anga da'alo angni jikgipani mikkilokklok ram'begipa mikkangko nikon, nichana amjaha, indakoba ianoni jokna mamung cholokoba man'jaha."

"Iasanma nang'ni dukara ?" budepa sing'aha. Ua bakan, an'tangni jola ning'chi jaktangko sikate, 'silgrakni cup ge'sako

b'kotaha. Budepa Bonggitna on'e aganaha, 'Ia cupko ra'angbo. Ian montol gnanggipa cup ong'a.' Unikoa, jakkalani pilak niamrangko talate agantaiaha, 'Na'simang jeko nanga aro je cha'aniko cha'na aka ukon ia cupan na simangna on'gen'

"Bonggit cupko ra'e, budepani mikkangon, 'Smilbegipa aro nambegipa cha'anirang ong'katbo,' ine aganaha. Unon bakan uni mikkango nambegipe aro smilbegipa cha'anirang ong'katbedeaha. Bonggit budepako mitele, okkaen cha'aha. Bonggitko wate re'angna akang budepa aganaha, 'Na'a ia cupko namen simsakbee donbo.'

"Bonggit bakan ua bol ja'pangoni, noktangona skete re'chakatbaaha. Da'o attam ong'ahachim. Ramao, chongipa bakrani sepango donggipa nok busruona soke re'pakbamitingo ua bi'sa sakgniko okkrie mi bi'e grapengako knaaha. 'Re'ange tusiebo, dedeang, anga knalo adita cha'anirangko am'e ra'bagen,' ine uamangni ma'gipa agan-mittake, uamangni grapako jripatna jotton ka'beengachim. Indiba bi'sarang batesa manigija rake rake grapesa bi'engachim

"Bonggit bakan dongdike, uamangni nokni cholgugao nine aganaha. 'Bi'sarang, ianona re'babo, anga na'simangna maiba cha-aniko on'gen.'

"Bi'sarang Bonggitni kattana ku'chi mitap mitap uona re'angtokaha. Uamangni ma'gipa uamangko aro Bonggitkoba nokningona napbachina aganaha. Bonggit an'tangni cupko bikote jako ra'e uamangni cha'na ska pilakkon ong katchina aganaha. Dikdixanon uamangni mikkango bason ge'brio spit spit gape nambegipa cha'anirang ong kataha. Ian ia okkribegipa manderangna mikbokgni nikani ong'achim. Uamang bakan an'tangtangna bason ge'prakko ra'e okkribean mikchi ku bol ku'bol cha'e dikdixanon matchotto-kaha.

"Unwalo Bonggit uamangni nokon waltuaha. Walo Bonggitni tusimipekmitingo, mikbokgipa me'chik Bonggitni cup gita srakmrak apsan dakgipa gipin ramram cupko ra'bae Bonggitni jolao donskae Bonggitni cupko cha'uriksaah. Pringgipino Bonggit mamungnaba simaakgija mamungnaba cho'igijagipa ramram cupkon ra'e noktangona re'chakatbaaha. Nokona soke nokni sa'raona sokmangnangengon

Bonggit kusi ong'bee ka'upo-oksopo dakpile a'boke jikgipako okamatha.
'Re'babo. Anga nang'na maiko man baaha niebo!"

"Segipani okamatana jikgipa ta'rakbeen re'baaha, indiba ia silgrakni cupko jola ning'oniko b.kote mesokon ua ka'onangbee segipako aganaha, 'Ia capko mesokna mangmangba na'a angko inditan rakbee chrike okamahama? Indakgipa silgrakni cupko anga jangnaba nikpakuja ine na'a chanchiama?"



Picture 19. "Smilbegipa cha'anirang spit spit basono gape cuponi ong'kataha."

"Ia cupde nang'ni nikronggipa ramram cup ong'ja. Iade aiao inamangipa, montol gnanggipa cupsa ong'a. Na'a ia cupko ra'e jeko cha'na aka ukon bi'aboching mikjapsanon ong'katanta ong'katja' na'a nikgen."

"Jikgipaba segipani agana gitan cupko ra'e an'tangi namnik-begipa cha'aniko ku'chi minok minok bimung minge bi'aha, indiba da'nang! mamung ong'ronggija ong'aniko ua nikjaha. Changni

changna daktaitaie nioba mamung ong'anikoba nikjaha. Iana Bo. aiao inmanbeaha. Ua an'tangan ua cupko ra'e nambegipa c aniko bimung minge bi'aha. Indakoba ia cup skango gita k ra'taijaha, cha'aniko ong'katattaijaha. Ua cupko jako ra'e . tangtango namen niwiiwilaha indakoba uchi sserikgipa me'c' budepani on'atgipa cup gita apsan dakgipa cupko on'ahani gir apsan cupan inesa ma'siaiaha. Indakode maidakesa skango gita niko ong'katattaijaha, ua aiao inmanbeaha. Cupni chologijachu togiahana ua duk ong'beaha. Okkriaan ok chi'ot chi'ot gam'f mikbokatna mangmang nambegipa cna anirangdo minge an'i kal'akana duk ong'bee jikgipaba grapsrangaha.

"Bonggit a'bru a'bru grapenggipa an'tangni jikgipani mikkan; chiring gita pejoljol jokenggipa mikchirangko aro greng-guasu rikk. rikkot nagange oko mirim rongsaba donggija ka'siksike, ka'tapo ka tapo dakenggipa jikko nitate dongaiaha. Unikoa Bonggit bakan cupko ra'e nokoni ong'kate, je biapo ua budepako grongahachim, ua apsan biaponan re'angtaiaha. Uano pilakba dongjahachim. Ua ua budepako grongna ka'donge asonge sengtime dongaha, indiba indita sengoba budepani mamung chin dongjachim. Walsimsim dakbahaon, Bonggit an't. ngni ka'donganiko gimaatsrangaha aro nokonan re'bpilaiaha.

"Pringgipino ua apsan biaponan re'angpiltaiaha. Gisiko nangbee sengtimengmitingon, ua apbani ja'birangko knaaha. Ua chakate nion uni skange gronggip, apsan budepani re'baengako nikaha. Budepa bakan Bonggitko nik. sing'aha, 'Angde, na'a maina ianona re'bataiaha?' 'Skigipa, je cupko na'a angna on atahachim ua cup da'o cholijaha, katta ra'jaha aro mamung cha'anikoba ong'katatjaha.'

"Indakede ong'na man'ja,' budepa ananaha. 'Ua cupko nina on'boching.'

"Bonggit cupko una on'on, budepa aganaha, 'Iade angni nang on'atgipa cup ong'ja. Na'a ge'gipin cupko man'na sikesa a! rokomni cupko ra'bae angko tongina jotton ka'engama?'

"Indakgipa chanchiani angni skoo napchongmotkuja, 'Bongg: jechakaha. 'Ian nang ni on'atgipa apsan cupan ong'chongmotachim.'

"'Ian angni on'atgipa cup ong'chongmotja,' ka'angbece budepa aganaha, aro uni on'ata cupko ra'e noktangona re'angpilani golpoko talen aganchina Bonggitko aganaha. Bonggitoniko uni chu'gimik golpoko knaon budepa aganaha, 'Je noko nape na'a uamangna kekchakahachim, ua mikbokrakgipa me'chik nang'ni cupko ra rikskae, mitangni ramrangipa cupko on atskaaha.'

'Apsandake nikgipa cupko bikote budepa Bonggitna on'e naha, 'Ia cupko ra'e na'a ua me'chikni nokona re'ange ua chikna on'bo aro jeko ska aro namnika ukon ong'katchina cupko atna aganbo. Uni ja'mano una ong a pilakko na'a nibo.'

"Bonggit ia apsan daggipa cupchi maikai an'tangni skanggipa cupko man'pilgen, mamungkoba uijaoba, budepani agana gitan ua cupko ra'e uni waltuanggipa noktopona re'angaha. Me'chikma bakan Bonggitko niksoe an'tangi cha'urikgipa cupko bi'pilna re'baaha ine chanchie namen kenbeaha indiba uni mikkango mang ka'a nangani chin donggija ku'sim ku'sim ka'dingsmitako nikon ua kenchajaha. Ka'a nange chrike an'tangni cupko bi'pilani pal Bonggit aganaha, 'Niboching, da'aloba anga ge'gipin montol gnanggipa cupko ra'bataiaha. Na'a jeko ska ukon ia cupa nang'na ong katate on'gen.'

"Ia mikbokgipa me'chik bakan ia ge'gipin cupko man'na namen kusi ong'beaha aro bakan Bonggitni jakoniko ra'aha. Bi'sarangba kusi ong'bee ma gipani ba'rao rim'kin'kingtoke nambegipa cha'anirangko ma'gipani on'ana senge tokaha. Me'chik bakan an'tangni namnikgipa cha'anirang' mitu mitu mingenba cupko ge'etaha. Maia cha'anikon ua bi'enggenchim pilakba uijaha, mangmang uni katta agana matchotkujaon cuponi ge'gni rakbegipa gol'dikrang ong'kate, me'chikkon gipan gip dokaha. Ua dondikgija raken me'chikko dokaha. Ua bakan ia gol'dikrangoni jokna palangni kokiamao nape dongnuaha, indiba ua jechi kata uchin gol'dikrangba ja'rike dondikgija dokruruaiaha. Ua saknabee chrike, ma'ame uchi chi katruruaha indiba jechi kata uchin gol'd kba chapding chapding i'ike doksimsimaha. Bon'kamao ua chrike aganaha, 'Ia gol'dikrangko an'bo. Mejale angni cha'urikgipa cupko anga nang'na on'atpilgen. sapae bakkak ia gol'dikrangko ra'pilbo.'

"Ia pilakrang ong'engmittingo Bonggitde maikai ong'aha aro aidake ong'angkugen mamungkoba chanchimanggija nitate ku'ma

gita dongaiaha. Ia cup gol'dikrangko ong'katatgipa cup ong'a
 inangba ua ufachim. Ua bukan cupko ra'pile an'tangni ka'bako
 donus jaktangchi rim'kope ra'aha. Bukan ge'gni gol'dikrangba
 gimaungaha. Man'na sikbeoba me'chik an'tangni cha'urikgipa
 cupko Bonggitan on'atpilaha. Bonggit an'tangni cupko rae
 re'chakatna skang ia kangal me'chikni dedrangrangna ka'sachak
 aganaha, 'Bi'sarang, salantian cha'anirangko on'na anga na'sima.
 ona re'baronggen.'

"Ge'gni cuprangko ra'e, indiba gol'dikko ong'katatgipa cupko
 dintangmancha simsakbee ge'gipin jolao ra'skae noktangona jiktango-
 na re'baaha. Ia changode Bonggit jikgipako okamatna skang, cupko
 ra'e saksan antangni namnikbegipa cha'anirangko ong'katachina
 ge'etaha. Unon ge'etako man'e smilbegipa cha'anirangko ong'katata-
 haon, ua jikgipako okamate, nanga gitan okkae cha'china on'aha.
 Ia skanggipa, cha'ronggijagipa smilbegipa cha'aniko cha'on, Bonggit
 jikgipani suk ong'e cha'ako, suk ong'bee nie roskae kusi ong'skabeaha.

"Golpo ianon bon'aha."

"Anga na'simangna golporangko aganna skoba be'en bilgribeaha.
 Da'on saa da on nama dakaiaha. Saksan donna kenchaka, sae-ding'o
 salsakbana man'ika inella mikkang sonibal salode songonan
 angkoba rimangengaha. Mikkang robibal salode na'simang angona
 re'bana nangjawaha, angaba songon ong'gnok aro jee ska unon
 an'chlug gronggrikna cholko man'gnok!"

"Na'a re'baode chirga kusi ong'begen ambi," bi'sarang kusi
 ong'bee agantokaha.

"Ia a'dapko aro angni ge'gimin me'su-sam'jakrangko watangna
 pakbeoba anga re'angran nangaignok maina mingani ja'mano
 mingsa rokom rokom sabisirangko man'rilrike anga salsani ja'mano
 salsa bilgriangrrobeaha. Anga an targba be'ertargan ia dungchakran
 man'pilja. Basakobade namjabatnaba danga ire an'tangba kenchak-
 pila. Umi gimn anga songon gipin buchamarang jakai janggi
 tangtoka ugitan tangpaaignok."

"Hurrah ! Ambi songonan re'baguok !"

Indaken bi sarang buchumako ku'dimchote kusi ong'bee noktang-
 tangona re'hapitokaha.

